



張說之文集卷第一

詩賦

御製喜雨賦

應制喜雨賦

進白鳥賦

墨詔批荅

虛室賦

宴居賦

江上愁心賦

畏途賦

侍宴三思山詩

侍宴蕤荷亭詩

侍宴臨渭亭詩

侍宴漣水詩

桃花園馬上詩


侍宴隆慶池詩

春日春宮詩

登驪山矚眺詩

扈從幸韋嗣立山莊

二首



送金城公主詩

同皇太子過荷恩寺二首

先天應令詩

奉和春日出苑詩

墨令答讚四言

喜雨賦

御製

仰重華之齊政步文命而舜倫何天道之去遠亦明  
徵而在人迄中夏而自春邁愆陽而爲亢雲重結而  
復解雨纔滴而還障山祠植珪而不荅田峻倚耒而  
怙音超悵京兆來奏音官撰曲將土龍而矯首請神巫  
而頓足彼有憑而可舉子何抑而未許恐歲凶之及  
人寧天譴於我身爾乃潔齋壇墀五精是祠暴立炎  
赫三日爲期上帝臨我衷誠不欺重泉蒸潤觸石吐

滋平雲黯而鋪幕密雨森其散絲無雷無電不震不  
眩匪疾匪徐乍合乍踈汎草泊樹垂珠點露過闌入  
樓含蜚雜霧或噴薄而攢集或淋漓而灌注亂積水  
之圓文拂微風之斜度寰海浹而康樂畎畝欣而相  
顧絲管合兮夜將曉芙蓉開兮日未暮原夫雨之爲  
德也無小大之異情無高卑之不乎無華朽之偏潤  
無薰臭之隔榮喜夫雨之今應也赴一言而不捨經  
累晨而廣瀉納清陰之浮涼混和氣而飄灑感作霖  
於殷命諷其雩於周雅家尚知乎禮節國有望於豐  
霸小陽臺之神人却大宛之走馬體雲行而雨施吾  
何事乎天下

喜雨賦

應制

叟臣啓先王之冊府校絕瑞於祥經樂雲雨之平施  
齊品物之流形帝皇益重而爲寶麟鳳自輕而讓靈  
沉愆時而渴望欲意達而神聽是月也朱明漸半紫  
油未吐恐降災兮此下人罄虔祈兮我人主退象龍  
之禮禱斥持鷺之貌舞屏翳慙其廢職祝融悔其遷  
怒天決漉而出雲地濤靈而下雨速一言而感應剋  
二日而周溥氣蒼靄以黔鷓鷃黯聲颭灑以蕭條璀  
如銀漢之屑落瓌以珠泉而噴澆街鄠漫其潢潦臯  
壤萋其綠苗舒四溟之清潤卷六合之煩囂咸澡骨  
於神液共歡心於聖朝借如五月有梅雨之名三春

有穀雨之氣越人以泥牛待沃胡士賣土龍求費出  
負嶠以石香入成都之酒味彼偏方以小節非大人  
之所貴復有送山祗於鬱島迎海若於葛川疾雷碎  
其山裂走電擘其海燃天子作愁霖之賦詞人綴苦  
雨之篇牆屋壞於倒井黍稷流於下田乃凶浸之不  
令曷休徵之有焉請言瑞雨之可喜也協氣交泰嘉  
生是賴湛覃而不溺衍溢而不害東漸出日之表西  
被無雷之外南窮火鼠之譯北盡燭龍之會天文則  
雲漢昭回王澤則江河滂沛雖欲譚天而窺管孰知  
堯德之爲大

進白鳥賦 并批答

咨大鈞之播氣在品物而流形有莫黑之凡族亦變  
白而効靈感上仁於孝道合中瑞於祥經若夫事出  
神妙理包舒卷既集王屋飛隨帝輦捧日高者翊迎風  
細轉識句句於招呼每啞啞於啄吮以其雪羽霜毛  
冰精玉狀拔竒綠林之下賞異紫臺之上瞰鳩鵲之  
紗牕抱鳳凰之衣桁恐同類之見嫉畏不才之速謗  
願悉命於渥恩豈顧私於開放維聖君之靈囿物何  
遠而不臻有能言而可重或善舞而取珍羞陋軀而  
入獻與寶羽而爲隣探朝噪之聲樂眷夜啼之曲新  
無芒距以耀武不鈎觜以懷仁謝先容而特達却假  
飾以全真鑒深心於反哺移報德於君親

墨詔批荅

得所進白鳥符彩明媚助日揚輝白羽翩翻凌霜比  
色況乎反哺斯重能仁是高對之有歡情不能已又  
覽所進放言體物詞藻瀏亮尋繹研味把翫無厭所  
謂文苑菁華詞場警策也今賞卿金五挺銀十挺云

虛室賦

明月窻前古樹簷邊無北堂之樽酒絕南隣之管絃  
理涉虛趣心階靜緣室惟生白人則思玄猷百慮之  
勞止歸一途之兀然嗟乎巧智首亂禮學增矯名起  
異端利成貪非役二見之交戰驅五神而雜擾形何  
費而不衰性何煩而不夭每竭源而追末必忘多而

獲少玉帳瓊宮圖奢務豐朱門金穴恃滿矜隆榮與  
辱而俱盛事隨夏而不窮陷營爲之桎梏留健美次之  
池籠心元是幻法本皆空莫不因無證實假異生同  
魚何知而樂水蛇何意而憐風大哉默識守此玄通  
顧瞻天下還如夢中

宴居賦 并序

吏部侍郎魏

仁歸

張校書作虛室賦以示予文旨清峻玄義深遠予味  
之有感聊爲宴居賦以和之其詞曰  
氣序忽諸日月其除夏盡炎歇秋至涼初地僻而人  
物自少庭閑乃室宇成虛寂爾無晤蕭然宴居臨見聖

賢於上古窺得失於前書或智而不足或愚而有餘  
諒千變而萬化嗟難得而備疏若夫名因行立宦由  
才致官要則謗議斯起譽高必讒毀俱至所以君子  
逃名達人避位養性以安其體摘文以見其志且貴  
不如賤善亦同惡貴則但益憂勞善乃未離貪著徒  
憐顛覆之禍虛纏愛慾之縛前事旣忘後車安託儻  
來未足有慰或去可以無作固當絕於可否齊其適  
莫聞寵詎警其心居陋寧改其樂蓋老氏稱德所貴先  
慈孔門之道一以貫之於常則允出茲在茲屈伸委  
運行用隨時旣無去無取亦何慮何思

江上愁心賦寄趙子岳州作

江上之峻山兮鬱鬱音嶷而不極雲爲峯兮煙爲色  
歛變態兮心不識江上之深林兮杳冥蒙而不已鳥  
爲花兮猿爲子紛盪漾兮言莫擬夏雲陰兮若山秋  
水兮平若天冬沙飛兮浙浙春草靡兮芊芊感四節  
之默運知萬化之潛遷伴衆鳥兮寒渚望孤帆兮日  
邊雖欲貫愁腸於巧筆紡離夢於哀絃是心也非模  
放之所逮將有言兮是然將無言兮是然

畏途賦

青泥路白馬關雲足躡霞手攀忠臣往兮孝子還陟  
羊腸臨鳥道搏絕岸接萼草懸梁媠娜以樹接虛閣  
穹崇而煙抱風雨滌汨兮崩泉而險湍圖畫詭屈兮

紅峯而碧巒林黝黝而人靜山叅叅而地寒客有夢  
兮在城闕背芳萱兮心不歇憫秋草之墜露弔窮崖  
之飛月聞哀猿之一鳴憂人宿昔兮生白髮

長安應制詩五首

侍宴三思山第 賦得風字韻

梁王池館好曉日鳳樓通竹町音挺羅千衛蘭筵降兩  
宮清歌芳樹下妙舞落花中臣學筵中聽還如大國  
風

侍宴萋荷亭

迴鑾青岳觀帳殿紫煙峯仙路迎三島雲衢駐六龍  
園林看花塔壇墀識餘封山外聞簫管還如天上逢

侍宴臨渭亭

青郊上巳豔陽年紫禁皇遊被渭川幸得歡娛承湛露  
露心同草樹樂春天

侍宴瀝水

賦得濃字

千行發御柳一葉下仙筇青浦宣遊至朱城佳氣濃  
雲霞交暮色草樹喜春容藹藹天旗轉清笳入九重  
桃花園馬上  
林間艷色驕天馬苑裏穠粧伴麗人願逐南風飛帝  
席年年含笑舞青春

景龍應制睿宗侍宴隆慶池

靈池月滿直城隈黼帳天臨御路開東沼初陽疑吐

出南山曉翠若浮來魚龍百戲分容與鳧鷖雙舟較  
泝洄願似金隄青草馥長承瑤水白雲盃

奉和春日幸望春宮

別館芳菲上苑東飛花澹蕩御筵紅城臨渭水天河  
靜闕對南山雨露通繞殿流鶯凡幾樹當蹊亂蝶許  
多叢春園既醉心知樂共識皇恩造化同

奉和登驪山矚眺

寒山上半空臨眺盡園中是日巡遊處晴光遠近同  
川明分渭水樹暗辨新豐崑壑清音暮天歌起大風  
應制登驪山寫眺

洞府寒山曲天遊日旰迴披雲看石鏡拂殿上金臺



竹徑龍駘下松庭鶴轡來雙童還獻藥五色耀山才

扈從幸韋嗣立山莊二首

應制

寒灰飛玉琯湯井駐金輿既得方明相還尋太隗居  
懸泉珠貫下列帳錦屏舒騎苑林逾密笳繁谷自虛  
門旗槩復磴殿幕裏通渠舞鳳隨公主雕龍起婕妤  
地幽天賞洽酒樂御筵初菲才叨侍從連藻愧應徐  
西京上相出扶陽東郊別業好池塘自非仁智符天  
賞安能日月共迴光

奉和送金城公主

應制

青海和親日潢星出降時戎王子聳寵漢國舅家慈  
春野開離讌雲天起別詞空彈馬上曲詎減鳳樓悲

先天應制奉和同皇太子過荷恩寺二首

翼翼宸恩永煌煌福地開離光昇寶殿震氣繞香臺  
上界幡花合中天日月來願君無量壽仙藻屢徘徊  
朗朗神居峻軒軒瑞像威聖君成願果太子拂天衣  
至樂三靈會深仁四皓歸還聞渦水曲更繞白雲飛

先天應令

三陽麗景早芳辰四序嘉園物候新梅花百般障去  
路垂柳千條暗迴津鳥驚直為飛風葉魚躍都由怯  
岸人唯願聖主南山壽何愁不賞萬年春

奉和春日出苑

禁林艷裔發青陽春望逍遙出畫堂雨洗亭臯千畝



節變寒初盡時和氣已春繁雲先合寸膏雨自依旬  
颯颯飛平野霏霏靜暗塵懸知花葉意朝夕望中新  
應制和同劉冕喜雨

青氣合春雨知從岱嶽來行雲避師出洒雨待軍迴  
獸浥塵清道空濛柳映臺最宜三五夜晴月九重開

遊興慶宮作并序 御製

暇日與兄弟同遊興慶宮登勤政務本及華萼相輝  
之樓所以觀風俗而勸人崇友于而敦睦詩以言志  
歌以詠言情發於衷率題此什

代邸青門右離宮紫陌垂庭如過沛日水若渡江時  
綺觀連鷄岫朱樓接鴈池從來敦棣萼今此茂荆枝

萬葉傳餘慶千年志不移凭軒聊屬目輕輦共追隨  
務本方崇訓相輝保羽儀時康俗易漸德薄政難施  
鼓吹迎飛蓋絃歌送羽卮所希覃率土孝悌一同規

奉和暇日遊興慶宮作 應制

漢武橫汾日周王宴鎬年何如造區夏復此睦親賢  
巢鳳新成閣飛龍舊躍泉棣華歌尚在桐葉戲仍傳  
禁禦氛埃隔平臺景物連聖慈良有裕王道固無偏  
問俗兆人阜觀風五教宣獻圖開益地張樂奏鈞天  
待酌衢樽滿詢芻諫鼓懸詠言彤友愛萬國共周旋  
觀拔河俗傳此戲必致年豐故命北軍以求

歲稔 御製

壯徒恒賈勇拔拒抵長河欲練英雄志須明勝負多  
譟齊山岌業氣作水騰波預期年歲稔先此樂時和

奉和觀拔河 應制

今歲好拖鈎橫街敞御樓長繩繫日住貫索挽河流  
闡力頻催鼓爭都更上籌春來百種戲天意在宜秋

奉和寒食作 應制

寒食春過半花濃鳥復嬌從來禁火日會接清明朝  
闢敵鷄殊勝爭毬馬絕調晴空數雲點香樹百風搖  
改木迎新燧封田表舊燒皇情愛嘉節傳曲與簫韶

過大哥宅探得歌字韻 御製

魯衛情先重親賢愛轉多冕旒豐暇日乘景暫經過

戚里申高宴平臺奏雅歌復尋爲善樂方驗保山河

奉和過寧王宅 應制

進酒忘憂觀簫韶喜降尋帝堯敦族禮王季友兄心  
竹苑龍鳴笛梧宮鳳繞林大風將小雅一字盡千金

同玉真公主過大哥山池二首 御製

澄潭皎鏡石崔嵬萬壑千巖暗綠苔林亭自有幽真  
趣况復秋深爽氣來

地有招賢處人傳樂善名鴛池臨九達龍岫對重城  
桂月先秋冷蘋風向晚清鳳樓遙可見鬢髻玉簫聲

石橋銘四言

梁園勝躅碣館佳遊苔深石暗山斜路幽橋非七夕

節是三秋爰停弄杼共此滄留

奉和同玉真公主遊大哥山池題石壁二首

池如明鏡月華開山學香爐雲氣來神藻飛爲鵲鷁賦仙聲颺出鳳凰臺

綠竹初成苑丹沙欲化金乘龍與駭鳳歌吹滿山林爽氣凝情迴寒光映浦深忘憂題此觀爲樂賞同心

石橋銘四言

玉梁架迴碧沼涵空石邊海上鑠鍛河中橫漢飛鵲規天拖虹仙聖來往風雲路通

賜諸州刺史以題座右

眷言思共理鑑寢想惟良猗歟此推擇聲績著周行

賢能旣俟進黎獻實佇康視人當如子愛人亦如傷講學試誦論阡陌勸耕桑虛譽不可飾清知不可忘求名迹易見安真德自彰獄訟必以情教民貴有常恤惇且存老撫弱復綏強勗哉各祇命知予眷萬方

奉和賜諸州刺史

應制

文明遍禹跡鰥寡達堯心正在親人守能令王澤深朝廷多秀士鎔鍊比精金犀節同分命熊軒各外臨聖主賦新詩令若聽董琴先言教爲本次言則是欽三時農不奪午夜犬無侵願使天宇內品物遂浮沉寄情群飛鶴千里一揚音共躡華胥夢龔黃安足尋

賜崔日知往潞州一首

御製

潞國開新府壺關寵舊臨妙旌循吏德特悅庶民心  
禮樂中朝貴仁明列郡欽揚風非贈扇易俗是張琴  
蕃鎮謳謠洽行宮雨露深會書丞相策先賜潁川金

奉和賜崔日知

應制

聖情留曩鎮佳氣翊興王增戟雄都府高車轉太常  
川橫八諫闊山帶五龍長連帥初恩命天人舊紀綱  
餞塗飛御藻闔竟自生光明主徵循吏何年下鳳凰

餞王峻巡邊

御製

振武威荒服揚文肅遠墟金壇申將禮王節授軍符  
冠冑三方外銜刀萬里餘昔時吳會靜今日虜庭虛  
分聞仍推轂援桴且訓車風揚旌旆遠雨洗甲兵初

坐見台堦謚行聞袂袂除檄來雖挿羽箭去亦飛書  
舟楫功斯著鹽梅望匪疎不應陳七德欲使化先敷

奉和送王峻巡邊一首

應制

六月歌周雅三邊諗夏卿欲施攻戰法先作簡稽行  
禮樂知謀帥春秋識用兵一勞堪定國萬里即長城  
策有和戎利威傳破虜名軍前雨灑道樓上月臨營  
別藻瑤華降同衣錦礫榮關山由義近戈甲爲恩輕  
絲竹路傍散風雲馬上生朝廷謂吉甫邦國望君平

奉和送宇文融安輯戶口

應制

至德臨天下勞情遍九圍念茲人去本蓬轉將何依  
外避征戍數內傷親黨稀嗟不逢明盛胡能照隱微

柏臺簡行李蘭殿錫朝衣別曲動秋風恩令生春輝  
使出兩海安詔下萬心歸作無夔龍佐徒歌鴻鴈飛

御製春中興慶宮酺宴一首 并序

夫抱器懷才含仁蘊德可以坐而論道者我於是乎  
闢重門以納之作扞四方折衝萬里可運籌帷幄者  
我於是乎懸重祿以待之是故外無金革之虞朝有  
縉紳之盛所以巖廊多暇垂拱無爲不言而海外知  
歸不教而寰中自肅元亨之道其在茲乎況乎天地  
交而萬物通陰陽和而四時序所寶者粟所貴者賢  
故以膏旰爲懷黎元在念盡力溝洫不知宮室之已  
卑致敬鬼神不知飲食之斯薄往以仲冬建子南至

初陽爰詔司存式陳郊祀挹夷夏之誠請荅人神之  
厚睠蚩歸太一禮備上玄以申昭報之情足以極嚴  
禋之道然心融萬類歸雷雨之先春慶洽百寮象雲  
天而高宴歲二月地三秦水汎汎而龍池滿日遲遲  
而鳳樓曙青門左右軒庭映梅柳之春紫陌東西帝  
幕動蜚霞之色撞鍾伐鼓雲起雪飛歌一聲而酒一  
盃舞一曲而人一醉詩以言志思吟湛露之篇樂以  
忘憂慙運臨汾之筆

九達長安道三陽別館春還將聽朝暇迴作豫遊辰  
不戰要荒服無刑禮樂新合酺卑土宇歡宴接群臣  
玉罕飛千日瓊筵薦八珍舞衣雲曳影歌扇月開輪

伐鼓魚龍雜撞鍾角觝陳曲終酣興晚須有醉歸人  
奉和春中興慶宮酺宴 應制

千齡逢啓聖萬域共來威慶接郊禋後酺承農事稀  
御樓橫廣路天樂下重闈鸞鳳調歌曲虹霓動舞衣  
合聲雲上聚連步月中歸物觀恩无外神和道入微  
鎬京陪樂飲柏殿奉文飛徒竭秋螢影何資春日暉

春晚宴兩相及禮官麗正學士 御製并序

朕以薄德祇膺曆數正天柱之將傾紉地維之已絕  
故得承奉宗廟垂拱巖廊居海內之尊處域中之大  
然後祖述堯典憲章禹績敦睦九族會同四海猶恐  
蒸黎未乂佻戍未安禮樂之政虧師儒之道喪乃命

使者衣綉服行郡縣因人所利擇其可勞而勞所以  
便億兆也乃命將士環介冑矢石審山川之向背應  
歲月之孤虛所以靜邊陲也乃命禮官考制度稽典  
則序文昭武穆享天地神祇所以申嚴潔也乃命學  
者繕落簡緝遺編纂魯壁之文章綴秦坑之煨燼所  
以修文教也故能使流寓返粉榆之業戎狄稱藩屏  
之臣神祇歆其禋祀庠序闡其經術既家六合時巡  
兩京函秦則委輸斯遠鼎邑則朝宗所利封畿四塞  
從來測景之都城闕千門自昔交風之地陰陽代謝  
日月相推豈可使春色虛捐韶華坐歇乃置旨酒命  
英賢有文苑之高才有掖垣之良佐舉盃稱慶何樂



如之同吟湛露之篇宜振凌雲之藻于時歲次乙丑  
開元十三年三月二十七日

探得風字

乾道運無窮恒將人代工陰陽調曆象禮樂報玄穹  
介胄清荒外衣冠佐域中言談延國輔詞賦引文雄  
野霽伊川綠郊明鞏樹紅冕旒多暇景詩酒會春風

侍宴探得開字

聖政惟稽古賓門引上才坊因購書立殿爲集賢開  
旄彥星辰下仙章日月迴字如龍負出韻是鳳銜來  
庭柳餘春駐宮櫻早夏催喜承芸閣宴幸捧柏梁杯

夏首花萼樓觀群臣寧玉山亭宴迴樓下又  
申之以賞樂賦詩并序御製

萬物莫不氣兆乎上而形視乎下鐵石異品雲蒸並  
溼草木無心春來咸喜故聖人弘道先王法天酒星  
主獻疇之義需卦陳飲食之象近命群官欣時樂宴  
盡九春之麗景匝三旬之暇日暢飲桂山棹歌泌水  
醇以養德味以平心本將導達陽和助成長育亦朝  
廷多慶軍國餘閑者也前月之晦細風飄雨繁絃中  
止列席半醉佳辰易失絕興難追良可惋也今年帶  
閏節候全晚暑氣猶清芳草未歇申布雅意復叙初  
筵披樂善之邸坐忘憂之觀東郊跬步南山在目足  
以締夏首之新賞補春餘之墜歡朕登覽上官俯臨  
長陌暢衆心之怡泰懽歸騎之逶迤鼓之以瑟琴宥

之以篚筐衢樽意洽場藿思苗賦我有嘉賓之詩奏  
君臣相悅之樂踟躕西日吟翫南風不知衷情發於  
翰墨也

今年通閏月入夏展春輝樓上風花晚城隅宴賞歸  
九歌揚政要六舞散朝衣天喜時相合人知事不違  
禮中推意厚樂處感心微別賞陽臺樂前句暮雨飛

奉和花萼樓下宴

萬心翹樂宴三舍緩昌時山接夏雲險臺留春日遲  
節移芳未歇興隔賞仍追醉後傳嘉惠樓前舞聖慈  
皇恩與時合天意若人期故廢前句雨新垂湛露詞

端午三殿宴群臣并序御製

律中蕤賓獻疇之象著火在盛德文明之義燁故以  
式宴陳詩上和下暢者也朕宵衣旰食緝聲教於萬  
方卜戰行師揔兵鈐於四海勤貪日給憂忘心勞聞  
蟬聲而悞物變見槿花而驚候改所賴濟濟朝廷視  
成鵷鷺桓桓邊塞責辦能罷喜麥秋之有登玩梅夏  
之無事時雨近霽西郊靡靡而一色炎雲作峯南山  
嵯峨而異勢正當召儒雅宴高明廣殿肅而清陰生  
列樹深而長風至厨人嘗散熱之饌酒正行陶暑之  
飲庖捐惡鳥俎獻肥龜新筒裹練香蘆角黍恭儉之  
儀有序慈惠之意溥洽諷味堯老致息心於真妙抑  
揚游夏滌煩想於詩書超然玄覽自足爲樂何止栢

枕桃門驗方術於經紀綵花命縷觀問遺於風俗感  
婆娑於孝女憫枯槁之忠臣而已哉歎節氣之循環  
美君臣之相樂凡百在會咸可賦詩五言紀其日端  
七韻成其火數豈獨漢武之殿盛朝士之連章魏文  
之臺壯辭人之並作云爾

五月符天數五音調夏鉤舊來傳五日無事不稱神  
穴枕通靈氣長絲命續人五時花競巧九子糞爭新  
方殿臨華飾圓宮宴雅臣進對一言重道文六義陳  
股肱良足詠風化可還淳

端午三殿侍宴

應制

探得  
魚字

小暑夏絃應微陰商管初願齊長命縷來續大恩餘

三殿褰珠箔群官上玉除助陽嘗委彘順節進龜魚  
甘露垂天酒芝花捧御書合丹同蠅蚌灰骨共蟾蜍  
今日傷蛇意銜珠遂闕如

千秋節宴并序

御製

令節肇開情兼感慶率題八韻以示群臣

蘭殿千秋節稱君萬壽觴風傳率土慶日表繼天祥  
玉宇開花萼金懸動會昌衣冠白鷺下帝幕翠雲長  
獻遺成新俗朝儀入舊章月銜花綬鏡露綴絲絲囊  
處處祠田祖年年宴杖鄉深思一德事小獲萬人康  
應制和千秋節

五德生王者千齡啓聖人赤光來照夜黃雲上覆晨

海縣銜恩久朝章獻壽新高居帝座出夾道衆官陳  
槩仗洗清景磬管凝秋旻珠囊含瑞露金鏡抱僊輪  
何歲無卿飲何田不報神薰歌與名節傳代幸群臣

奉和賜王公千秋鏡 應制

寶鏡頒神節凝規寫聖情千秋題作字長綬帶爲名  
月向天邊下花從日裏生不承懸象意誰辨照心明

千秋節賜群臣鏡 御製

鑄得千秋鏡光生百鍊金分將賜群后遇象見清心  
臺上冰華澈窻中月影臨更銜長綬帶留意感人深

張說之文集卷第二

張說之文集卷第三

雜詩

早登太行山中言志 御製

清蹕渡河陽凝笳上太行火龍明鳥道鐵騎繞羊腸  
白露霏陰壑丹霞助曉光澗泉含宿凍山草帶餘霜  
野老茅爲室樵人薜作裳宣風問耆艾敦俗勸耕桑  
涼德慙先哲徽猷慕昔皇不因今展義何必冒垂堂

奉和太行山中言志 應制

六龍鳴玉鑿九折步雲端河眷南浮近山輕北上難  
羽儀映松雪戈甲帶春寒百合晨笳動千崑曉仗攢  
皇心感韶節敷藻念人安旣立省方館復置建神壇

扈蹕參天老承榮忝夏官長勤百年意思見一勝殘

爰因巡省途次舊居

御製并序

朕昔在初九佐貳此州未遇扶搖之力空俟海沂之  
詠洎大橫入地出處斯易一揮寶劍遽履瑤圖承曆  
數而順謳謠着天衣而御區夏嗟乎向時沈默駕駟  
馬而朝京師今日逍遙乘六龍而問風俗爰因巡省  
途次舊居山川宛然人事無閒忽其鼎革周遊館宇  
觸目依然雖迹異漢皇而地如豐邑擊筑慷慨酌桂  
留連空想大風題茲短什

三千初擊浪九萬欲搏空天地猶驚否陰陽始遇蒙  
存身斯歷試佐貳佇昭融多謝時康理良慙寶劍功

長懷問鼎氣夙負拔山雄不學劉琨舞先歌漢祖風  
英髦既包括豪傑自牢籠人事一朝異謳謠四海同  
如何昔朱邸今此作離宮鴈沼澄瀾翠猿嵒落照紅  
小山餘桂馥長坂舊蘭蕪即是滄留處乘歡樂未窮

奉和爰因巡省途次舊居

應制

葱鬱興王郡殷憂啓聖圖周成會西土漢武幸南都  
歲卜鑿興邁農祠鴈政敷武威稜外域文教靡中區  
警蹕干戈捧朝宗萬玉趨舊藩人事革新豐國容殊  
壁有真龍畫庭餘鳴鳳梧藂觴祝堯壽合鼎獻湯厨  
陽樂寒初變春恩蟄更蘇三耆頌命服五稔復田輸  
君賦大風起人歌湛露濡從臣觀玉葉方願紀靈符

過晉陽宮

御製

緬想封唐處實惟建國初  
俯察伊晉野仰觀乃叅墟  
井邑龍躍斯城池鳳翔餘  
林塘猶沛澤臺榭宛舊居  
運革祚中否時遷命茲符  
顧循承丕構怵惕多憂虞  
尚恐威不逮復慮化未孚  
豈徒勞轍跡所期訓戎車  
習俗問黎人親巡慰里閭  
永言念成功頌德臨康衢  
長懷經綸日歎息履庭隅  
艱難安可忘欲去良踟躕

應制奉和

太原俗尚武高皇初奮庸  
星軒三晉躔土樂二堯封  
北風遂舉鵬西河亦上龍  
至德起王業繼明賴人雍  
六葉啓昌期再興廣聖蹤  
傳呼大駕來文物如雲從

連營火百里繼觀人千重  
翠華渡汾樓白日臨罕峯  
粉榆恩賞洽桑梓舊情恭  
往運感不追清時惜難逢  
詩發尊祖心頌刊盛德容  
願君及春事迴輿綏萬邦

早渡蒲關

鍾鼓嚴更曙山河野望通  
鳴鑿下蒲版飛旆入秦中  
地險關逾壯天平鎮尚雄  
春來津樹合月落戍樓空  
馬色分朝景鷄聲逐曉風  
所希常道泰非復俟繻同

應制奉和

蒲版橫臨晉華芝曉望秦  
關城雄地險橋路扼天津  
樓映行宮日隄含宮樹春  
黃雲隨寶鼎紫氣逐真人  
東詠唐虞跡西觀周漢塵  
山河非國寶明主愛忠臣

初入秦川路逢寒食

御製

洛川芳樹映天津  
灞岸垂楊翠地新  
直爲經過行處  
樂不知虛度  
兩京春去年有閨  
今春早曙色和風  
著花草可憐  
寒食與清明  
光輝併在長安道  
自從關路入秦川  
爭到何人不戲鞭  
公子途中方蹴踘  
佳人馬上發鞦韆  
渭水長橋今欲度  
恣恣漸見新豐樹  
遠看驪岫入雲霄  
預想湯池起壺霧  
煙霧氤氳水殿開  
暫拂香泉歸去來  
今歲清明行已晚  
明年寒食更相陪

應制奉和

上陽柳色喚春歸  
臨渭桃花拂水飛  
摠爲朝廷巡幸去  
頓教京洛少光輝  
昨從分陝山南口  
馳道依依漸

花柳入關正投寒食  
前還京遂落清明後  
路上天心重豫遊  
御前恩賜特風流  
便幕那能鏤鷄子  
行宮善巧帖毛毬  
渭橋南渡花如撲  
麥隴青青斷人目  
漢家行樹直新豐  
秦地驪山抱温谷  
香池春溜水初平  
預歡浴日照京城  
今歲隨宜過寒食  
明年倍宴作清明

途中經華嶽

御製

飭駕去京邑  
鳴鑾指洛川  
脩途經太華  
迴蹕暫周旋  
翠嶠留斜影  
懸巖冒夕烟  
四方皆石壁  
五位配金天  
髣髴看高掌  
依稀聽子先  
終當銘歲月  
從此記靈仙

應制奉和

西嶽鎮皇京  
中峯入太清  
玉鑾重嶺應緹騎  
薄雲迎

雲齊日懸高掌寒空映削成軒遊會神處漢幸望仙情  
舊廟青林古新碑綠字生群臣願封岱還駕勒鴻名  
潼關口號

御製

河曲迴千里關門限二京所嗟非恃德設險致天平

應制奉和

天德平無外關門東復西不將千里隔何用一九泥

過王濬墓

御製

吳國分牛斗晉室命龍驤受任敵已滅策勲名不彰  
居美未盡善矜功徒自傷長戟今何在孤墳此路傍  
不覩松栢茂空餘荆棘場歎嗟懸劍隴誰識夢刀祥  
應制奉和

斗牛三分國龍驤一統年智高寧受制風急肯迴船  
有策擒吳馘無言讓范宣援孤因勢屈功重爲讒偏  
舊跡灰塵散枯墳故老傳百代逢明主何辭死道邊

經河上公廟

御製

昔聞有耆叟河上獨遺榮迹與囂塵隔心將道德并  
詎以天地累寧將寵辱驚矯然翔寥廓如何屈堅真  
玄玄妙門啓蕭蕭祠宇清冥冥無先後那能記姓名  
應制奉和

河上無名老知非漢代人先探道德要留待聖明辰  
玄妙爲天下清虛用谷神化將和氣一用與太初隣  
靈廟觀遺像仙歌入至真皇心齊万物何處不同塵



途次陝州

御製

境出三秦外途分二陝中山川入虞號風俗限西東  
樹古棠陰在耕餘讓畔空鳴笳從此去行見洛陽宮

應制奉和

周邵嘗分陝詩書空復傳何知萬乘睽追賞二南篇  
郡帶洪河側宮臨大道邊洛城將日近佳氣滿山川

行次成臯途經先聖擒建德之所緬懷功業

感而賦詩

御製

有隋政昏虐群雄已交爭先聖按劍起叱咤風雲生  
飲馬河洛竭作氣嵩華驚克敵睿圖就擒俘帝道亨  
顧慙嗣寶曆恭承天下平幸過剪鯨地感慕神且英

應制奉和

夏氏階隋亂自言河朔雄王師進穀水兵氣臨山東  
前掃成臯陣却下洛陽宮義合帝圖起威加天宇同  
軒臺百年外虞典一巡風戰龍思王業倚馬賦神功

經鄒魯祭孔子而歎之

御製

夫子何為者棲棲一代中地猶鄒氏邑宅即魯王宮  
歎鳳嗟身否傷麟怨道窮今看兩檻奠當與夢時同

應制奉和

孔聖家鄒魯儒風藹典墳龍駘迴舊宅鳳德詠餘芬  
入室神如在昇堂樂似聞懸知一王法今日待明君

野次喜雪

御製

拂曉闢行宮寒臯野望通繁雲伋遠岫飛雪舞長空  
賦象恒依物縈迴屢逐風爲知勤恤意先此示年豐

應制奉和

寒更玉漏催曉色御前開決滂雲陰積氤氳風雪迴  
山如銀作瓮宮見壁成臺欲驗豐年象飄颻仙藻來

温湯對雪

御製

北風吹同雲同雲飛白雪白雪乍迴散同雲何慘裂  
未見温泉水寧知火井滅表瑞良在茲庶希可怡悅

應制奉和

瑞雪帶寒風寒風入陰琯陰琯方凝閉寒風復淒斷  
宮似瑤林布庭如月華滿王歎挾續詞非近湯泉暖

惟此温泉是稱愈疾豈予獨受其福思與地  
人共之乘暇巡遊乃言其志

御製

桂殿與山連蘭湯湧自然陰崖含秀色温谷吐潺湲  
績爲蠲邪著功因養正宣願言將億兆同此共昌延

應制奉和

温泉媚新豐驪山橫半空湯池薰水殿翠木暖煙宮  
起疾迎仙藻無私合聖功始知堯舜德心與萬人同

按獵義成喜逢天雪率題九韻以示群官

弧矢威天下旌旗遊近縣一面施烏羅三驅教人戰  
暮雲成積雪曉色開行殿皓然原隰同不覺林野變  
北風勇士馬東日華組練觸地銀麈出連山縞鹿見

月兔落高繒星狼下飛箭既欣盈尺兆復憶磻溪便  
歲豐將遇賢俱荷皇天眷

應制奉和

文教資武功郊畋閱邦政不知仁育久徒看禽獸盛  
夜霰氛埃滅朝日山川靜綽仗飛走繫抨弦筋角勁  
帝射參神道龍馳合人性五豕連一發百中皆先命  
勇爵均萬夫雄圖羅七聖星爲告符老雪作豐年慶  
喜聽行獵詩威神入軍令

幸鳳泉湯

御製

西狩觀周俗南山歷漢宮薦鮮知路近省殿覺年豐  
陰谷含神慶湯泉養聖功益齡仙井合愈疾醴源通

不重鳴岐鳳誰矜陳寶雄願將無限澤霑沐衆心同

應制奉和

周狩因岐禮秦都辨雍名獻禽天子孝存老聖皇情  
溫潤宜冬幸遊畋樂歲成湯雲出水殿煖氣入山營  
坎意無私結軋心稱物平帝歌流樂府溪谷也增榮  
扈從溫泉宮獻詩

溫泉啓蟄地氛氳渭浦歸鴻日數群騎仗聯聯環北  
極鳴笳步步引南薰松間綵殿籠佳氣山上朱旗繞  
瑞雲不知遠夢華胥國何如親奉帝堯君

宿直溫泉宮羽林獻詩

冬狩美秦正新豐樂漢行星陳玄武閣月對羽林營

寒木羅霜仗空山嚮夜更恩深靈液暖節効古松具  
文武皆王事輸心不爲名

羽林恩召觀御書王太尉碑

隴首名公右來承聖札歸魚龍生意態鈎劍動鎡輝  
字得神明保詞慙少女徽誰家羽林將文逐鳳書飛

玄武門侍射并序

開元之初季冬其望天子始御北闕朝羽林軍禮修  
事厥後二日乃命紫微黃門九卿六事與熊羆之將  
爪牙之臣合宴焉侑以純錦頒以珍器爾其射堋新  
成秦侯旣設禦仗林立帷軒霧布衆官半醉皇情載  
悅卷珠箔臨玉除唐弓在乎夏箭斯發應絃命中屬

羽連飛弧矢已來未之有也若夫天地合道星辰獻  
儀端視和容內正外直自近而制遠耀威而觀德思  
無不通神無不極用是射也其惟聖人乎于時繁雲  
覆城大雪飛苑天人同澤上下交歡退食懷恩賦詩  
頌義凡若干篇

射觀通玄闔兵攔闕御筵彫弧月半上畫的暈重圓  
羿后神幽贊靈王法暗傳貫心精四返飲羽妙三聯  
雪鶴來銜箭星麟下集弦一逢軍宴洽萬慶武功宣

張說之文集卷第三

張說文集卷第四

雜詩

扈從南出雀鼠谷

豫動三靈贊時巡四海威  
硤關凌曙出平路半春歸  
霍鎮迎雲罕汾河送羽旂  
山南柳半密谷北草全稀  
遲日宜華蓋和風入夾衣  
上林千里近應見百花飛

答張說南出雀鼠谷

御製

雷出膺乾象風行順國人  
川途猶在晉車馬漸歸秦  
背陝關山險橫汾鼓吹頻  
草依陽谷變花待北巖春  
聞有鸚鵡客清詞雅調新  
求音思欲報心迹竟難陳

奉和聖答張說南出雀鼠谷

宋璟

秦地雄西夏并州近北胡禹行山啓路王在邑爲都  
忽視寒暄隔深思險易殊四時宗伯敘六義宰臣鋪  
徵作宮常應星環日每紆盛哉逢合道良以致亨衢

同前

蘇頌

雨施巡方罷雲從訓俗迴密途汾水衛清蹕晉郊陪  
寒着山邊靜春當日下來御祠玄鳥應仙仗綠楊開  
作頌音傳雅觀文色動台更知西向樂宸藻協鹽梅

同前

王丘

襟帶三秦接旂裳萬乘過陽源淑氣早陰谷沍寒多  
花縟前茆仗霜嚴後殿戈戍雲開晉嶺江鴈入汾河  
北土分堯俗南風動舜歌一聞天樂唱恭逐萬人和

同前

袁暉

魏國山河險周王警蹕迴九旗雲際出萬騎谷中來  
石岸行將盡煙郊望忽開賞矜垂柳拂春畏落花催  
興逸橫汾體恩褒作頌才小臣瞻日月延首詠康哉

同前

崔翹

硤路繞河汾晴光掃曙氛笳吟中嶺樹仗入半峯雲  
頓覺山原盡平看邑里分早行芳草末晚想好風薰  
嘉頌推英宰春遊扈聖君共欣承睿渥日月照天文

同前

張九齡

設險諸侯地承平聖主巡東君朝二月南旆擁三辰  
寒出重關盡年隨行漏新瑞雲叢捧日芳樹曲迎春

舞詠先馳道恩華及從臣汾川花鳥意併奉屬車塵

同前

王光庭

省俗恩時遍巡方路稍迴寒隨汾谷盡春逐晉郊來  
雲騎傳行漏烟旄引從臺惠風初應律和氣正調梅  
雅頌通晨禁天文接曙台霸城桃李色應待日華開

同前

席豫

鳴鑾初幸代旋蓋欲橫汾山盡千旗直郊平五校分  
前林已暄景後壑尚寒氛風送簫韶曲花鋪黼黻文  
鹽梅推上宰禮樂統中軍獻賦紆天札飄飄飛白雲

同前

梁昇卿

河忽重關道千年遇聖皇幽林承惠澤閑客見清光

日御先途遠山靈獻壽長寒雲入晉薄春樹隔汾香  
國佐同時雨天文屬歲陽從來漢家盛未若此巡方

同前

趙冬曦

軒轅應順動方牧正趨陪道合殷爲礪時行楚有材  
省方西禮設振旅北方迴地理分中壤天文照上台  
寒依汾谷去春入晉郊來竊比康衢者長歌仰大哉

送張說巡邊

御製

端拱復垂裳長懷御遠方股肱申教義戈劍靜要荒  
命將綏邊服雄圖出廟堂三台入武帳八座起文昌  
寶胄匡韓主華宗輔漢王茂先慙博物平子謝文章  
盡節恢時佐輸誠禦寇場三軍臨朔野駟馬即戎行

鼓吹威夷狄旌軒溢洛陽雲臺先著美今日更貽芳  
餞張尚書赴朔方序 賈曾奉 勅撰

王者大司馬制軍詰禁封國正朔惠綏蠻貊刑齊猾  
夏其儀尚矣天子道穆三象功清六合截海來威窮  
荒揆教將以靜流服度藩畿削憚凌暴昭蘇寡弱乃  
命元宰兵部尚書燕公專節朔方授律群帥涉河之  
外距關之西公皆統之重分閫也公智以關物精以  
造微文為一變之英武有萬人之敵歷登庶尹王猷  
載寧三宅台衡帝采惟亮雖坐堂足以制勝而勤國  
忘其定居闔茂次年仲臯貞閏拜手東洛馳軺北闕  
備官而行成旅以從是日也景風司至星火殷霄伯

趙鳴而戒陰爽鳩習而揚武禮可以昇高遠望詩可  
以出宿餞行有詔具寮爰開祖宴且申後命寵以繁  
錫天章賦別御札題牋副衣勉挾纊之誠兼壺喻投  
醪之旨筐篚以將其貺筆硯以表其文前載忝書今  
策斯覩侍中安陽公以仁體國中書令河東公以德  
熙朝燮贊功成訃謀景暇恭采薇之恩典悵伐木之  
朋思詢彼甸師卜茲郊候鼎門右轉歧路傍分當闕  
塞之斷山接華林之高樹幕人宿設重帟雲平太官  
饗舉百羞霞錯四夏六胤之變朱于皇羽之容雷殷  
川原電燧林薄朝傾多士巷無居人接蓋陰衢揚袂  
風野羽觴遠進列座酣而不譁清鏡間發將士激而



逾厲視日知其吉氣吹律驗其商聲則已景列穹都  
風騰漠野西域輕郵支之使東胡息冒頓之虞顧夫  
南仲于征吉甫薄伐不其遠也若木還照前苑啓行  
聽闐闐之去鼓目悠悠之轉旆歌事者每懷靡及念  
離者政予望之成志在心發言同唱天子有命式敘  
清風請編出車之什以繼蒸人之雅

將赴朔方軍 應制

禮樂逢明主韶鈐用老臣恭憑神武策遠御鬼方人  
供帳榮恩餞山川喜詔巡天文日月送朝賦管絃新  
幼志傳三略衰材謝六鈞膽猶忠作伴心故道爲隣  
漢保河南地胡清塞北塵連年大軍後不日小康辰

劍舞輕離別歌酣忘苦辛從來思博望許國不謀身

奉和聖製送張尚書巡邊

源乾曜

匈奴邇河朔漢地復戎旅天子擇英才朝端出監撫  
流星下閭闔寶鉞專公輔禮物主光輝宸意備恩詔  
有征示矛戟制勝惟罇俎彼美何壯哉桓桓擅斯舉  
聲華振臺閣功德標文武奉國知命輕忘家以身許  
安人在勤恤保大彈襟腑此外無異言同情報明主

同前

張嘉貞

天錫我宗盟元戎付夏卿多才思將相必勇獨橫行  
經緯稱人傑文章作代英山川看是陣草木想爲兵  
不待河冰合猶防漢月明有謀當繫醜無戰且綏氓

閩外專三略雲中奠一平感恩共心盡悵別屢魂驚  
直視前旌掣遙聞後騎鳴還期方定日復此出郊迎

同前

宋璟

帝道薄存兵王師尚有征是開司馬法爰命摠戎行  
畫闡崇威信分麾盛寵榮聚觀方結轍出祖遂傾城  
聖酒山河潤天詞象緯明德風邊地偃勝氣朔雲平  
宰國推良器爲軍挹壯聲至和常得體不戰即亡精  
以智泉寧竭其徐海自清遲還廟堂坐贈別故人情

同前

盧從愿

上將發文昌中軍靜朔方占星引旌節擇日拜壇場  
禮樂臨軒送威聲出塞揚安邊俟帳幄制勝在巖廊

作鼓將軍氣投醪壯士觴戒途遵六月離贈動三光  
槐路清梅暑衡臯赴麥涼時文仰雄伯耀武震遐荒  
衽席知無戰兵戎示不忘佇聞歌杖杜凱入繫名王

同前

許景光

文武承邦式風雲感國禎王師親賦政廟略久論兵  
漢主知三傑周官統六卿四方分閩受千里坐謀成  
介冑辭前殿壺觴宿左營賞延頒賜重宸贈出車榮  
龍武三軍氣魚鈐五校名郊雲駐旌羽邊吹引金鉦  
振旅方稱德安人更克貞佇觀銘石罷同聽凱歌聲

同前

韓休

一德光台象三軍掌夏卿來威申廟略出摠協師貞

受鉞辭金殿，凭軒去鼎城。曉光搖組甲，踈吹繞雲旌。  
左律方先凱，中聲即訓兵。定功彰武事，陳頌紀天聲。  
祖宴初留賞，宸章更寵行。車徒零雨送，林野夕陰生。  
路極河流遠，川長朔氣平。南轅遲反旆，歸奏謁承明。

同前

徐知仁

聖德膺三統，皇威被八埏。大明均照物，小醜未寧邊。  
國相台衡重，元戎廟略宣。紫泥方受命，黃石乃推賢。  
問罪陰山下，安人屬國前。度關行照月，乘帳坐銷烟。  
北闈紆宸藻，南檣列祖筵。耀威當夏日，殺氣指秋天。  
鼙鼓元龜鬣，振旌旗鳥獸懸。由來詞翰首，今見勒燕然。

同前

崔禹錫

供帳何煌煌，公其撫朔方。群寮銜餞酌，明主降離章。  
關塞重門下，郊歧禁苑傍。練兵宜雨洗，卧鼓候風涼。  
炎景寧云憚，神謀肅所將。旌搖天月迴，騎入塞雲長。  
赫赫皇威震，油油聖澤滂。非惟按車甲，兼以正封壇。  
叱吒陰山道，澄清朔海陽。虜垣行決勝，台座佇爲光。

同前

王翰

紫蓋尚書印，朱駟丞相車。登朝身許國，出閫將辭家。  
不憚炎蒸苦，親嘗走集賒。選徒軍有令，誓卒尔無譁。  
帝樂風初起，王城日半斜。寵行流聖作，寅餞照台華。  
騎歷河南樹，旌搖天北沙。榮懷應盡服，嚴殺已先加。  
業峻靈祇保，功成道路嗟。寧知鑿空使，遠致石榴花。

同前

蘇晉

方漢比周年興王令在宣丞聞降虜拜復覩出師篇  
圻父萬邦式英猷三略傳筭車申夏政菱舍啓戎田  
嚴問盟胡苑軍容濟洛川皇情悵關旆詔餞列郊筵  
路接禁園草池分御井蓮離聲軫去角居念斷歸蟬  
三捷豈云永七擒良信然具寮有誠寄望凱秋風前

同前

王光庭

賢相德符充朝推文武雄海波先若鏡關草預從風  
鉞助將軍勇威成天子功瓊章九霄發錫宴五衢通  
玉輶龍盤帶金裝鳳頸驄虎貌紛凝凝河洛震熊熊  
戈劔千霜白旌旗萬火紅示刑夷夏變流惠鬼神同

寇息軍容偃塵銷朔野空用師敷禮樂非是爲獯戎

同前

袁暉

出師宣九命分閫用三台始應幕中畫言從天下來  
丹青不獨任韜略遂雙該坐見威稜洽彌彰事業恢  
旌旗曉霜送輦鼓朔風催虜氣銷殘月邊聲運落梅  
羽書雄北地龍漢寢南垓寵戰黃金盡輸誠白日迴  
離章宸翰發祖宴國門開欲識恩華盛平生文武材

同前

席豫

聖帝重兵權分麾屬大賢中軍仍執政丞相復巡邊  
翕習戎裝動張皇廟略宣朝榮承睿札野餞轉行旃  
亭障東緣海沙場北際天春冬見嚴雪朝夕候烽烟

已勒燕山頌猶聞遣戍篇五營將月合八陣與雲連  
經略圖方遠懷柔道更全歸來畫麟閣藹藹武功傳

同前

張九齡

宗臣事有征廟筭在休兵天與三台座人當萬里城  
朔南方偃革河右誓揚旌寵錫從仙禁光華出漢京  
山川勤遠路原隰軫皇情爲動薰琴唱仍題寶劔名  
威風六郡勇計日五戎平山甫歸應疾留侯功復成  
歌鍾旋可望枕席豈難行四牡何時入吾君憶履聲

同前

徐堅

至德撫遐荒神兵赴朔方帝思元帥重爰擇股肱良  
累相承開地深籌協子房寄崇專斧鉞禮備設壇場

輦相推風后周官重夏卿廟謀能允迪韜略又縱橫  
吉日四黃馬宣王六月兵擬清雞鹿塞先指朔方城  
列將懷威撫匈奴畏盛名去當推轂送來仲出郊迎  
絕漠蓬將斷華筵槿正榮壯心看舞劔別緒應懸旌  
睿錫承優旨軋文復寵行暫勞期永逸赫矣振天聲

同前

崔日用

輦相推風后周官重夏卿廟謀能允迪韜略又縱橫  
吉日四黃馬宣王六月兵擬清雞鹿塞先指朔方城  
列將懷威撫匈奴畏盛名去當推轂送來仲出郊迎  
絕漠蓬將斷華筵槿正榮壯心看舞劔別緒應懸旌  
睿錫承優旨軋文復寵行暫勞期永逸赫矣振天聲

同前

賀知章

荒憬盡懷忠梯航已自通九攻雖不戰五月尚持戎

遣戍徵周牒恢邊重漢功撰車命元宰授律取文雄  
曹出天弧上謀成帝幄中詔旂分夏物專討錫唐弓  
帳宿伊生右鉦吹晉苑東饗人藉蕢實樂正理絲桐  
岐陌涵餘雨離川照曉虹恭聞詠方叔千載舞皇風  
送張說集賢上學士 御製

廣學開書殿崇儒引席珍集賢招袞職論道命台臣  
禮樂洽今古文章革舊新獻酬罇俎列賓主位班陳  
節變雲初夏時移氣尚春所希光史策千載仰茲晨  
集賢殿書院奉 勅送學士張說上賜讌序

中書舍人

張九齡

集賢殿者本集仙殿也上不以惟睿作聖而猶垂意

好學用相必本於經術圖王亦始於師臣及乎鴻生  
碩儒博聞多識之士自開元肇建以迄于今大用徵  
集燮乎廣內而聽政餘暇式讌在茲忠臣嘉賓得盡  
心之所聰明文思有光被之德故下以道親上亦歡  
甚即於御座爰發德音以爲候彼神人事雖千載傳  
於方士言固不經遂改仙爲賢去華務實且有後命  
增其學秩是以集賢之廷更爲論思之室矣中書令  
燕國公外弼庶績以奉沃心之謀內講六經以成潤  
色之業故得出入華殿師長翰林惟帝用藏固天所  
賴拜命之日荷寵有加降聖酒之壘下御厨之膳食  
以樂侑人思德飽時則有待中安陽公等承恩預焉

學士右散騎常侍東海公等攝職在焉或禹稷大賢  
泉雲諸彥文王多士周室以寧武帝得人漢家爲盛  
而高視前古獨不在於今乎咸可賦詩以光鴻烈

賦得輝字

侍帝金華講千齡道固稀任將賢士設書共學徒歸  
首命深燕隗通經淺漢章列筵榮賜食送客愧儒衣  
賀鷲窺簷下遷鶩入殿飛欲知朝野慶文教日光輝

賦得迎字

源乾曜

盛業光書府徵人盡國英絲綸賢相稱群俊學爲名  
寵命垂天錫崇恩發睿情薰風清禁禦文殿述皇明  
日霽庭陰出池新水氣生歡娛此無限詩酒自相迎

賦得昇字

裴淮

問道圖書盛尊儒禮教興石渠因學廣金殿爲賢昇  
日月恩光照泉雲寵命膺謨猷言可軌舟楫事斯憑  
宴喜明時洽光輝湛露凝大哉堯作主天下頌歌稱

賦得茲字

蘇頲

肅肅金殿裏招賢固在茲鏘鏘石渠內庠序亦同時  
宴錫歡談道文成貴說詩用儒今作相敦學舊爲師  
下濟天光近中來帝渥滋國朝良史載能事日論思

賦得西字

韋抗

廣庭臨壁沼多士侍金閨英宰文儒協明君日月齊  
集賢光首拜改殿發新題早夏初移律餘花尚拂溪

壺觴接雲上經術引關西聖德鴻名遠將陪王檢泥

賦得迴字

程行謨

聖主崇文化鏘鏘得盛才相因歸夢立殿以集賢開  
象繫微言闡詩書至道該堯罇承帝澤禹膳自天來  
禮洽歡逾長風恬暑更迴國朝將舜頌同是一康哉

賦得催字

李暘

偃武堯風接崇文漢道恢集賢更內殿清選自中台  
佐命留侯業詞華博物才天厨千品降夏日百壺催  
鵷鷺方成列神仙喜暫陪復欣同拜首叨此頌良哉

賦得登字

蕭嵩

帝日間才能旌賢在股肱文章體一變禮樂道逾弘

芸閣英華入賓門鵷鷺登恩延過所望聖澤實超恒  
夏菜開紅藥餘花發紫藤微臣亦何幸叨此預文明

賦得私字

李元紘

碩儒延鳳詔金馬被鴻私饌玉還丹禁歲花降紫墀  
銜恩傾百酒鼓舞詠康時暫構群書緝逾昭盛業丕  
接筵欣有命擗管愧無詞自驚一何幸太陽還及葵

賦得暮字

賀知章

西學垂玄覽東堂發聖暮天光燭武殿時宰集鴻都  
枯朽霑皇澤翺飛舞帝梧跡同遊汗漫榮是拔泥塗  
三歎承湯鼎千歡接舜壺微軀可不荅空欲詠依蒲

賦得今字

陸堅



聖主崇文教層霄降德音尊賢澤既厚式宴寵逾深  
復有夔龍相良哉簡帝心得人惟邁昔多士諒推今  
書殿榮光滿儒門喜氣臨顧惟成濫吹徒此接衣簪

賦得賓字

劉昇

圖書應明主策府宴嘉賓台耀臨東壁乾光自北辰  
網羅窮象繫述作究天人聖酒千鍾洽仙廚百味陳  
成山徒可仰涉海詎知津幸逢文教盛還覩頌聲新

賦得筵字

王翰

東堂起集賢貴得後神仙首命台階老將崇御府負  
送人鏘玉珮中使拂瓊筵和樂薰風解湛恩時雨連  
長材成磊落短翮強翩翩徒仰蓬萊地何階不讓緣

賦得蓮字

趙冬曦

淺術方觀海恩深忽見天學開丹殿籍名與石渠賢  
良輔膺休命微生謬採甄春餘仍哢鳥夏近未舒蓮  
牋札來宸禁衣冠集詔筵史臣知醉德欲記升中年

賦得華字

韋述

修文中禁啓改字令名加台座徵人傑書坊應國華  
賦詩開廣宴賜酒酌流霞雲散明金闕池開照玉沙  
掖垣留宿鳥温樹落餘花謬此天光及銜恩醉日斜

左丞相說右丞相璟太子少傅乾曜同日上

官命宴東堂賜詩

御製

赤帝收三傑黃軒舉二臣由來丞相重分掌國之鈞

我有握中璧雙飛席上珍子房推要道仲子訝風神  
復輟台衡老將爲調護人鵷鸞同拜日車騎擁行塵  
樂聚南宮宴觴連北斗醇俾予成百揆垂拱問彝倫  
丞相少傅拜職 天子作三傑之詩以命

宴序

蘇晉

惟聖寶賢以齊皇極有若左丞相燕國公右丞相廣  
平公太子少傅安陽侯皆生人碩德皇國元老道著  
廊廟績宣華戎由是懋其成功錫以元吉咨日于朔  
擇時于秋俾對命王庭受職公府見群屬捐庶寮禮  
官辨章掌舍陳次工備侑饗獻蒸六卿拜下以成儀  
三事自天而來賀秩秩賓序暉暉旅疇玉緯垂文南

風和雅頌之變金漿降醴雲天光飫酌之宜宰德貴  
和盡莊敬具瞻之軌群才尚洽預周旋宴語之歡方  
將一心天工勗力帝載寢黑山之析包青海之戈雲  
雨賢才水火菽粟日詠魚藻歲陳由庚頤殷趙之年  
留魯陽之景爰命在宴乃賡載歌

奉和 御製

張說

大塊鎔群品輕生偶聖時猥承三仕命虛忝百僚師  
右揆謀華碩前星傳重資連騫求舊禮濫點樂賢詩  
賜釜同榮拜擬金宴宰司菊花吹御酒蘭葉捧天詞  
寶曆休明盛頽年畧漏衰少留青史筆未敢赤松期

同前

宋璟

丞相邦之重非賢諒不居老臣庸且憊何德以當諸  
厚秩先爲忝崇班復此除太常陳禮樂中掖降簪裾  
聖酒山河潤仙文象緯舒冒恩懷寵祿陳力省空虛  
郭隗慙無駿馮諼愧有魚不知周勃者榮幸定何如

同前

乾曜

睿作超千古湛恩育萬人遞遷俱荷澤同拜忽爲隣  
道合音徽暢芳馳景命新鼓鍾崇享禮鵷鷺集朝倫  
竊位思官謗彫容謝木春慙多無以敘拙備實難陳  
進級懷三少承光盡百身自當歸第日何幸列宮臣

同前

蕭嵩

審官思共理多士屬惟唐歷選台庭舊來熙帝業昌

入朝師百辟論道協三光垂拱資元老親賢輔少陽  
登榮崇禮送寵德耀宸章卿酒飛觴洽仙闈雅樂張  
荷恩思有報陳力愧無良願罄忠公節同心奉我皇

同前

裴光庭

樂賢聞往誥褒德偶茲辰端揆升元老師謀擇累仁  
紫庭崇讓畢粉署禮容陳旣荷恩榮舊俱承寵命新  
天文懸瑞色聖酒汎華茵雜選陳簫鼓歡娛洽搢紳  
掖垣招近侍虛薄厠清塵共保堅貞節常期雨露均

同前

宇文融

申甫生周日宣慈舉舜年何如偶昌運比德邁前賢  
寵護元良密榮瞻端揆遷職優三仕老位極百僚先

北極迴宸渥南宮飾宴筵飛文瑤札降賜酒玉盃傳  
謬列台衡重俱承雨露偏誓將同竭力相與効塵涓

奉蕭中令酒并詩

樂奏天恩滿盃來秋興高更蒙蕭相國對酒飲醇醪

奉宇文黃門酒

聖德垂甘露天章下大風又承黃閣賞願作黑頭翁

奉裴中書酒

西掖恩華降南宮命席闡詎知雞樹後更接鳳池歡

同二相已下群官宴樂遊園 御製

撰日巖廊暇需雲宴樂初萬方朝玉帛千品會簪裾  
地入南山近城分北斗餘林塘垂柳密原隰野花踈

帝幕看逾暗歌鍾聽自虛興闌歸騎轉還奏弼違書

恩賜樂遊園宴

張說

漢苑佳遊地軒庭近侍臣共持榮幸日來賞豔陽春  
饌玉頌王篚擬金下帝鈞池臺草色徧宮觀柳條新  
花綬光連榻朱顏暢飲醇聖朝多樂事天意每隨人

同前

宋璟

侍飲終醑會承恩續勝遊戴天惟慶幸選地即殊尤  
北向祇雙闕南臨賞一丘曲江新溜暖上苑雜花稠  
疊疊韶絃屢交交賁帛周醉歸填畛畛陌榮耀接軒裘

同前

崔沔

五日醑初畢千年樂未央復承天所賜終宴國之陽

地勝春逾好恩深樂更張落花飛廣座垂柳拂行觴  
庶尹陪三吏諸侯具萬方酒酣同抃躍歌舞詠時康

同前

張九齡

實管延後命供帳序群公形勝宜春接儀文建禮同  
晞陽人似露解愠物從風朝慶千齡始年華二月中  
輝光遍草木和氣發絲桐歲歲爲無事徒知樂九功

同前

胡皓

五醑終宴集三錫又歡娛仙阜崇高異神州眺覽殊  
南山臨皓雪北闕對明珠宰座鸚鵡滿昌庭駟馬趨  
綺羅含草樹絲竹吐郊衢銜杯不能罷歌舞恣唐虞

同前

王翰

未極人心暢何如帝道明仍嫌醑宴促復寵樂遊行  
陸海披珍藏天河望斗城四關清藹合數處白雲生  
飪餼調元氣歌鍾溢雅聲空慙堯舜力至德睿難名

同前

崔尚

春日照長安皇恩寵庶官合錢承罷飲宴帛賜追歡  
供帳憑高列城池入迴寬花催相國飲鳥和樂人彈  
北闕雲中見南山樹杪看樂遊宜締賞舞詠惜將闌

同前

趙冬曦

爽塏三秦地芳華二月初醑承奠璧罷宴是合錢餘  
柳翠垂堪結桃紅卷欲舒從容會鸚鷺延曼戲龍魚  
喜氣通空物歡聲來里閭聖恩將厚意請述記言書

張說之文集卷第四

此圖雲中見... 炎熾三秦... 春日... 不避入心... 均賴... 不避入心... 均賴... 不避入心... 均賴...

張說之文集卷第五

雜詩

東都酺宴五首 并序

先天元祀孟冬十月東都留守韋公黃奉聖朝述宣嘉旨乃合洛京之五省招河尹之二縣將吏咸集佩章有序鏘鏘濟濟侃侃閭閻供帳於興教之門式酺宴也原夫樂生於心非因結風之奏和達於氣無待陽春之節蓋澤之所及也深則情之所感者遠國家天地一統君臣百年朝榮舊德之序野賴先疇之業玄化漸漬洪恩既久太上功德不宰夏后命子之初皇帝孝理無為漢祖事親之日生堯舜於天屬見文

武於同時前古未逢斯人何幸是日六樂振作萬舞  
弄弱鳥獸徘徊士女踊躍則知衆庶觀聽之所樂也  
言酒絡繹大庖燔炙芳溢風煙醉流阡陌又知衣冠之  
所適也由近而視遠萬國之慶皆然自明而察幽三靈  
之欣可接若夫吟詠德澤播越仁聲斯固雅頌之餘波  
政教之遺美凡我詞客安敢闕如賦詩展事垂列于後

詩一

堯舜傳天下同心致太平吾君內舉聖遠合至公情  
錫命承丕業崇親享大名二天資廣運兩曜益齊明  
道暢昆蟲樂恩深朽蠹榮皇輿久西幸留鎮在東京  
合宴千官入分曹百戲呈樂來嫌景遽酒着訝寒輕

喜氣連雲閣歡呼動洛城人間知幾代今日見河清

詩二

重華昇寶曆軒帝眇閑居政成天子孝俗返上皇初  
忘味因觀樂歡心寄合醑自憐疲馬意戀戀主恩餘

詩三

朱城塵暄滅翠幕景情開震震靈鼉起翔翔雲舞來  
彫盤裝草樹綺乘結樓臺共喜光華日酣歌捧玉盃

詩四

曉月調金鼓朝暾對玉盤爭馳群鳥散鬪伎百花團  
遇聖人知幸承恩物自歡洛橋將舉燭醉舞拂歸鞍

詩五

愷宴惟今席餘歡殊未窮入雲歌嫋嫋向日妓叢叢  
馱管催酣興留關待曲終長安若爲樂應與萬方同  
晦日詔宴永穆公主亭子 賦得流字

堂邑山林美朝恩晦日遊園亭含淑氣竹樹繞春流  
舞席千花騎歌舫五綵樓群歡與王澤歲歲滿皇州  
三月三日詔宴定昆池官莊 賦得筵字

鳳皇樓下對天泉鸚鵡洲中匝管絃舊失平陽嘉麗  
地今逢上巳盛明年舟將水動千尋日幕共林橫兩岸  
煙不降王人觀袂飲誰令醉舞拂賓筵

舟中和蕭令潭字  
暮春三月日重三春水桃花滿襖潭廣樂逶迤天上

下仙舟搖衍鏡中酣

清明日詔宴寧王山池

賦得飛字

今日清明宴佳境惜芳菲搖揚花雜下嬌轉鸞亂飛  
淶渚傳歌榜虹橋度舞圻和風偏應律細雨不沾衣  
承恩如改火春去春來歸

三月二十日詔宴樂遊園

賦得風字

樂遊形勝地表裏望郊宮北闥連天頂南山對掌中  
皇恩貸芳月旬宴美成功魚戲芙蓉水鸞啼楊柳風  
春花看欲暮天澤戀無窮長袖招斜日留光待曲終  
季春下旬詔宴薛王山池序  
有生之性萬殊無方之感一節陽和而動植暢春滿



而臯壤悅后皇所以發時令布新慶二南邁周召之  
風百辟形金石之詠者也碧流日暖南山雪殘首獻  
之浹辰暮春之提日帝京形勝借上林而入遊戚里  
池臺就脩竹而開宴泉調御府味給天廚仙唱宥樂  
中貴督酒太平佳事前史未書大矣哉一德日新九  
功惟敘運璿樞而均四氣握金鏡而靜萬方堯舜湯  
文不違顏於咫尺夔龍伊呂共接手於朝廷不克見  
而見焉不可聞而聞者豈深思勝殘去殺累百年之  
至仁推曆按圖啓千齡之昌運河清難得人代幾何  
擊壤之歡良有以也此則青門上路朱郎平臺城煙  
屢起而泊山野風時來而過水春將悵別愛落花之

灑途夏如欣會玩峯雲之映沼爾其列筵受几分曹  
設幕艇送江鳧舡迎海鷗魚龍九劔曼延揮霍鸞鳳  
簫鼓朋鳴輩作申錫開於百甕慈心出於三爵炮炙  
熏林塘醪醴馱丘壑林急管於無筭醉湛恩以取樂  
群公賦詩俾僕題序長卿消渴覺含毫之轉遲子雲  
老夫見彫蟲之都廢敢憚鄙詞之訥澀恐貽盛集之  
蕪穢云爾

四月十三日詔宴寧王亭子好字

何許承恩宴山亭風日好綠嫩鳴鸛洲陰穠闢雞道  
果思夏來茂花嫌春去早行樂無限時皇情及芳草

藥園宴武洛沙將軍

洛字

東第乘餘興南園宴清洛文學引王枚歌鍾陳衛霍  
風高大夫樹露下將軍藥待聞出塞還丹青上麟閣  
鳳樓尋勝地

西掖持醇酒東山就白雲開軒淶池映命席紫蘭芬  
舞度花爲伴鸞來管作群太平多樂事春物共氛氲  
皇帝降誕日集賢殿賜宴

仲秋金帝起五日土行昭瑞表壬寅露光傳甲子霄  
陰風吹大澤夢日照昌朝不獨華封老千年喜祝堯  
恩制賜食於麗正書院宴 林字

東壁圖書府西園翰墨林誦詩聞國政講易見天心  
位竊和羹重恩叨醉酒深緩歌春興曲情竭爲知音

洛橋北亭

詔餞諸刺史

離亭拂御溝岸曲舞舩樓詔餞朝庭牧符分海縣憂  
股肱還入郡父母更臨州扇逐仁風轉車隨零雨流  
恩光水上溢榮色柳間浮預待群方最三公不遠求  
修書學士奉 勅宴梁王宅 樹字

虎殿成鴻業猿巖題鳳賦既荷大君恩還蒙小山遇  
秋吹凝絃管涼雲生竹樹共惜朱邱歡無辭洛城暮  
夕宴房主簿舍并序

旅聽清館崇扃宴鑰巖雲暗山微月白夜悄群動之  
具息感孤鴻之遠音有美房公霞海其量友我以絲  
竹好我以罇俎紆蘊結之雅懷豁悠曠之陳意滿堂

既醉同賦是詩

歲晏關雍空風急河渭水薄遊羈物役微尚愜遠憑  
旅館月宿永閉扃雲思興伊人美修夜朋酒惠來稱  
文談既清雅琴吹亦淒凝不逢君騫涸幽意長鬱蒸

岳州宴姚紹之并序

姚司馬往在柏臺每欽骨鯁及茲荒服偶得官聯復  
有令弟美脗芬芳襲予山寺外廬幽深形勝童冠是  
集歡言賦詩

把梓滯江濱光華白日新難允金作友媚子玉爲人  
山水含秋興池亭借善鄰簷松風送靜院竹鳥來馴  
翠竿吹黃菊瑯盤贈紫鱗緩歌將醉舞爲拂繡衣塵

幽州夜飲

涼風吹夜雨蕭瑟動寒林正有高堂宴能忘遲暮心  
軍中宜劔舞塞上重笳音不作邊城將誰知恩遇深

溫泉馮劉二監客舍觀妓

溫泉寒林暮王遊樂事多佳人蹀駿馬乘月夜相過  
秀色燃紅黛嬌香發綺羅鏡前鸞對舞琴裏鳳傳歌  
妬寵傾新意銜恩奈老何爲君留上客歡笑斂雙蛾  
行從方秀川與劉評事文同宿

方秀美盤遊頻年降天罕水共伊川接山將闕門斷  
捧日照恩華攀雲引疲散野宿霜入帳孤衾寒不暖  
靜聞宮漏踈卧視庭月滿開鑪命溫酌中夜發清管

風送關山長氣遒星歲短寓言情義愜適興具意坦  
環中病羈掛方外嫌縱誕願君樂盛時無嗟帶襄緩

崔禮部園亭

窈窕留清館虛徐步晚陰水連伊闕近樹接夏陽深  
柳蔓憐垂拂藤苗愛上尋訝君軒蓋侶非復俗人心

城南亭作

珂馬朝歸連萬石稍門洞啓親迎客北堂珍重琥珀  
酒庭前列肆茱萸席長袖遲迴意緒多清商緩轉自  
騰波舊傳比翼侯家舞新出將雛生第歌漢家絳灌  
餘兵氣晉代浮虛安足貴正逢天下金鏡清偏加日  
飲醇醪意語亭子莫畏不芳菲會待城南春色至競

將花柳拂羅衣

對酒行 巴陵作

留侯封萬戶園令壽千金本爲成王業初由賦上林  
繁榮安足恃霜露遞相尋烏哭楚山外猿啼湘水陰  
夢中城闕近天畔海雲深空對忘憂酒離憂不去心  
清夜酌

秋陰士多感雨息夜無塵清罇宜明月復有平生人

醉中作

醉後樂彌勝未醉時動容皆是舞出語揔成詩

張說之文集卷第五

張說之文集卷第五  
雜詩  
送趙二尚書彥昭北伐  
虜地河冰合邊城備此時兵連紫關路將舉白雲司  
題劔榮中賞啣珠盛出師日華光組練風色焰旌旗  
投筆樽前起橫戈馬上辭梅花吹別引楊柳賦新詩  
送郭大夫再使吐蕃  
犬戎廢東獻漢使馳西極長策問酋渠猜阻自夷殛  
容髮徂邊歲旌裘弊海色五年一見家妻子不相識  
武庫兵猶動金方事未息遠圖侯才智苦節輸筋力  
脫刀贈分手書帶加飡食知君萬里侯立功在異域

張說之文集卷第六  
雜詩

送趙二尚書彥昭北伐

虜地河冰合邊城備此時兵連紫關路將舉白雲司  
題劔榮中賞啣珠盛出師日華光組練風色焰旌旗  
投筆樽前起橫戈馬上辭梅花吹別引楊柳賦新詩

送郭大夫再使吐蕃

犬戎廢東獻漢使馳西極長策問酋渠猜阻自夷殛  
容髮徂邊歲旌裘弊海色五年一見家妻子不相識  
武庫兵猶動金方事未息遠圖侯才智苦節輸筋力  
脫刀贈分手書帶加飡食知君萬里侯立功在異域

送鄭大夫惟忠從公主入蕃還字韻

鳳吹遙將斷龍旗送欲還傾都邀節使傳酌緩離顏  
春磧沙連海秋城月對關和戎應賞魏定遠莫辭班

送李侍郎迥秀薛長史季昶同賦水字

漢郡接朝廷幽并對烽壘旌旗按部曲文武惟卿士  
薛公善籌畫李相威邊鄙中冀分兩河長城各萬里  
藉馬黃花塞蒐兵白狼水勝敵在安人爲君汗青史

送趙頤真郎中赴安西

絕鎮功難立懸軍命匪輕復承遷相後珍重任賢情  
將起神仙地才稱禮樂英長心堪繫虜短語足論兵  
日授休明法星教置陣名龍泉恩已署鸞領相終成

月窟窮天遠河源入塞清老夫操別翰承旨頌營平

送崔二長史日知赴潞州

東山懷卧理南省悵悲翁共見前途促何知後會同  
莫輕一筵宴明日半成空況爾離庭闕思歸迷夢中

同賀八送充公赴荊州

疇昔同聲友騫飛出鳳池風雲一蕩薄日月屢叅差  
此別黃葉下前期安可知唯憐楚南樹不爲歲寒移

送高唐州

常時好閑獨朋舊少相過及尔宣風去方嗟別日多  
淮流春婉婉汝海路蹉跎百歲屢分散歡言復幾何

送蘇合宮頤

都邑群方首商泉万俗訛變風須愷悌成化佇絃歌  
疇昔珪璋友雍容文雅多振纓遊省闈鏘玉宰京河  
別曲鸞鳥初下行軒雉尚過百壺非餞意流詠在人和

送王駿自羽林赴永昌令

將星移北落神雨避東京為負剛腸舉還追強項名  
白雲向伊闕黃葉散昆明多謝絃歌宰稀聞桴鼓聲

同王僕射山亭餞岑廣武義得言字

聞道長岑令奮翼宰旅門長安東陌上送客滿朱軒  
琴爵留佳境山池借好園茲遊恨不見別後綴離言

送喬安邑備

書閣移年歲文朋難復辭歡言冬雪滿恨別夏雲滋

外尹方為政高明自不欺老人駸馭往童子狎鄒嬉  
日茂西河俗寂寥東觀期遙懷秀才令京洛見新詩

送任御史江南發糧以賑河北百姓

河朔人無歲荆南義廩開將興泛舟役必佇濟川才  
花月臨江浦春雲歷楚臺調飢坐相望繡服幾時迴

送王尚一嚴嶷二侍御赴司馬都督軍

漢掖通沙塞邊兵護草腓將行司馬令助以鐵冠威  
白露鷹鳥初下黃塵騎欲飛明年春酒熟留酌二星歸

送李問政河北簡兵

斗酒貽朋愛踟躕出御溝依然四牡別更想八龍遊  
密親仕燕薊連年邇寂讎因君閱河朔垂淚語幽州

送薛植入京

青組言從史鴻都忽見求款言人向老飲別歲方秋  
髣髴長安陌平生是舊遊何時復相遇宛在水中流

送宋休遠之蜀任

求殊友損益行道異窮申綴我平生氣吐贈薄遊人  
結恩事明主忍愛遠辭親色麗成都俗膏腴蜀水濱  
如何從宦子堅白共淄磷日月千齡旦河山萬族春  
懷鈇書瑞府橫草事邊塵不及安人吏能令王化淳

送梁知微渡海東

今日此相送明年此相待天上客星迴知君渡東海

別平一師

王子不事俗高駕眇難追茅土非屑眄傾城無樂資  
宴坐深林中三世同一時皎皎獨性心不爲網塵欺  
竭來已復去今去何來思迴首謝同行動會安清期

送武貞外郎中春赴秀師嵩山塔下舍利

懷玉泉戀仁者寂滅真心不可見空留影塔巖巖高下  
寶玉四海轉千輪金壤百粒送分身山中二月娑羅  
會虛唄遙遙愁思人我念過去微塵劫與子禪門同  
正法雖在神仙蘭省閒常持清淨蓮花菜來亦好去  
亦好了觀車行馬不移當見菩提離煩惱

送尹補闕元凱琴歌

公善琴贈琴歌

鳳哉鳳哉啄琅玕飲瑤池栖崑崙之山哉中國有聖



人感氣飛來飛來自歌自舞先王冊府騏驎之臺羈  
雌衆雛故山曲其鳴喈喈其鳴喈喈欲往街之欲去  
來去別鸞鳳心徘徊明年阿閣梧桐花葉開群飛鳳  
歸來群飛鳳歸來

送王光庭

同居洛陽陌輕日嬾相求及爾江湖去言別悵悠悠  
楚雲眇羈翼海月倦行舟愛而不可見徒嗟芳歲流  
新都南亭郭大元振盧崇道

行徑女蘿蹊連洲文石隄靜深人俗斷尋玩往還迷  
碧潭秀初月素林驚夕栖褰幌納蟾影理琴聽猿啼  
佳辰改宿昔勝寄坐睽攜長懷賞心愛如玉復如珪

相州前池別許鄭二判官景先神力

數步圓塘水雙鴻戢羽儀一飛喬木上一返故林垂  
澹泊含秋景虛明抱夜規無因留絕翰雲海意差池  
黃鶴岳州宴別潭州王熊二首

絲管清且哀一曲傾一盃氣將然諾重心向友朋開  
古木無生意寒雲若死灰贈君芳杜草爲植建章臺  
縉雲連省閣溝水遽西東然諾心猶在容華歲不同  
孤城臨楚塞遠樹入秦宮誰念三千里江潭一老公

奉荅張岳州王熊二首

長沙辭舊國洞庭逢故人薰蘭敦久要披霧轉相親  
歲月方嗟老江山不惜春忽聞黃鶴曲更作白頭新

平生共風月倏忽間山川不期交淡水暫得欸忘年  
興逸方罷釣帆開欲解船離心若危旆朝夕爲君懸

余昔忝省閣與岳州張使君潭州都督同官  
聯事後承朝譴各自東西張公與王都督別  
詩二首情頗殷切余覽以耿歎因遙申和云

韋嗣立

茂先王佐才作牧楚江隈登樓正欲賦復遇仲宣來  
黃鵠飛將遠雕龍文爲開寧知昔聯事聽曲有餘哀  
昔時陪二賢纓冕會神仙一去馳江海相逢共播遷  
無因千里駕忽覩四愁篇覽諷歡何已歡從徒愴然

岳州別王十一趙公入朝

昔濫貂蟬長同承雨露霏今參魚鼈守望美洞庭歸  
浦樹懸秋影江雲燒落輝離魂似征帆恒往帝鄉飛

奉別燕公趙國公王琚

五載朝天子三相逢舊寮扁舟方輟棹清論遂終朝  
遠樹煙間沒長江地際遙帝城馳夢想歸帆滿風颺

岳州別梁六入朝

遠洑長沙渚欣逢賈誼才江山疲應接風日復晴開  
江樹雲間斷湘山水上來近州朝鷺集古戍夜猿哀  
岸杼含蒼捄河蒲秀紫臺月餘偏地賞心盡故人盃  
目我遠京路嗟君此泝洄容華因別老交舊與年頽  
夢是長安陌朝宗實盛哉

奉別燕公

梁知微

華容佳山水之子猷承明符竹迺小郡江湖被德聲  
三年計吏入路指巴丘城鳧舟纔結纜騶駕已相迎  
別離他鄉酒委曲故人情孤嶼早煙泊長波晚氣清  
辛勤方遠鷺勝賞屢難并迴瞻洞庭浦日暮愁雲生

送梁六自洞庭山作

巴陵一望洞庭秋日見孤峯水上浮聞道神仙不可  
接心隨湖水共悠悠

廣州蕭都督入朝過岳州宴餞

得冬字韻

孤城抱大江節使往朝宗果是臺中舊依然水上逢  
京華遙比日疲老颯如冬竊羨能言鳥銜恩向九重

此葉世行本皆缺收

翁先生從宋本手抄補

入後之讀此書者勿易

視之 毛康識

岳州別姚司馬紹之制許歸侍

和玉悲無己長沙宦不成天從扇枕願人遂倚門情  
方外懷司馬江東憶步兵向君棲泊處空嶺夜猿鳴

岳州送李十從軍歸桂州

送客江之上其人美且德風波萬里濶歡舊十年來  
劍拔蛟知斷弓鳴虎自開楊橋書未落駟馬定先迴

岳州別均

離筵非讌喜別酒正銷魂念尔猶童孺嗟余隔遠藩  
津亭拔心草江路斷腸猿他日將何見愁來獨倚門

送敬丞

嘉會良難永芳罇此夜閑別離三春暮親愛兩鄉間

落花已覆水巖雲欲起山庭蘭行可佩采采贈河關

見諸人送杜承詩因以成作荊州作

吳楚分江鎮華容改舊城訝君來遠謁知有去思情

風度沅湘險煙還雲夢平寄言洞庭郡何德子為名

幽州別陰長河

惠好交情重辛勤世事多荆南久為別前北遠來過

寄目雲中鳥留歡酒上歌影移轂復間遲暮兩如何

幽州送隨軍入秦

揚子來戎幕老夫欣主諾歸路有光華邊庭少咨度

鴈知窮朔苦人羨長安樂獨將馬草心因轂謝臺閣

幽州送尹恣成婦

疑作馬華

婚禮知無賀承家歎有輝親迎驥子躍吉兆鳳雛飛  
溫席開華扇梁門摟聚衣遙思桃李日應賦採蘋歸

嶺南送使三首

秋鴈逢春返流人何日歸將予去國淚灑子入鄉衣

飢狔啼相聚愁猿啼更飛南中不可問書此示京畿

獄中生白髮嶺外罷紅顏古來相送處凡得幾人還

萬里投荒裔來時不見親一朝成白首看取報家人

南中別王陵成崇

握手與君別歧路贈一言曹卿禮公子楚媪饋王孫

修爾生六翩翩飛戾九門常懷客鳥意會荅主人恩

石門別楊六欽望

燕人同竄越萬里自相哀影響無期會江山此地來  
暮年傷汎梗累日慰寒灰潮水東南落浮雲西北迴  
俱看石門遠倚棹兩悲哉

端州別高六猷

異壤同羈竄途中喜共過愁來時舉酒勞罷罷或長歌  
南海風潮壯西江瘴癘多於焉復分手此別傷如何

南中別蔣五向青州

老親依北海賤子棄南荒有淚皆成血無聲不斷腸  
此中逢故友彼地送還鄉願爲楓林葉隨君渡洛陽

南中別陳七李十

二年共遊處一旦各西東請君聊駐馬看我轉征蓬

畫鷁愁南海離駒思北風何時侶春鴈雙入上林中

南中送北使二首

傳聞合浦葉曾向洛陽飛何日南風至還隨北使歸  
紅顏渡嶺歇白首對秋衰高歌何由見層堂不可違  
誰憐炎海曲淚盡血霑衣

待罪居重譯窮愁暮雨秋山臨鬼門路城繞瘴江流  
人事今如此生涯自可求逢君入鄉縣傳我念京周  
別恨歸途遠離言暮景適夷歌翻淚下蘆酒未消愁  
聞有胡兵急深懷漢國羞和親先是詐歎塞果爲讎  
釋繫應分爵蠲徒幾復侯廉頗誠未老孫叔且無謀  
若道馮唐事皇恩尚可收

張說之文集卷第六

雜詩  
山中  
...

張說之文集卷第七

雜詩

贈崔公

我聞西漢日四老南山幽長歌紫芝秀高卧白雲浮  
朝野光應絕榛蕪年貞秋一朝驅駟馬連被入龍樓  
昔遁高皇去今從太子遊行藏唯聖節福禍在人謀  
卒能匡惠帝豈不賴留侯事隨年代遠名與圖籍留  
平生欽淳德慷慨景前修螭蛤同陰兔蛟龍望斗牛  
無嗟異飛伏同氣幸相求

留贈張御史張判官

旅窟南方遠傳聞北使來舊庭知玉樹同浦識珠胎

白髮因愁改丹誠託夢迴皇恩若再造爲憶不然灰  
贈高六戩

北極辭明代南溟宅放臣丹誠由義盡白髮帶愁新  
烏墮炎洲氣花飛洛水春平生歌舞席誰意不歸人

贈廣平公宋大

亞相本時英歸來復國禎朝推長孺直野慕隱之清  
傳節還閩障皇恩入漢京寧思江上老歲晏塞無成

贈趙公

湘東股肱守心與帝鄉期舟楫中路蹇風波復來思  
嘉我常聯翼金貂侍玉墀跡參前馬聖名綴鬻熊師  
寒暑一何速山川遠間之寧知洞庭上獨得平生時

精義微絕簡從權討妙碁林壑爲予請紛靄發華滋  
流賞忽已散驚帆忽難追送君在南浦侘傺投此詞

奉荅燕公二首

王琚

誰道零陵守東過此地遊友寮同省閣昆弟接荊州  
我逐江潭鴈君隨海上鷗屢傷神氣沮久別鬢毛秋  
疑嶺春應遍陽臺雨欲收主人情未盡高駕少淹留  
語別意悽悽零陵湘水西佳人金谷返愛子洞庭迷  
舊館逢花發他山值鳥啼江天千里望唯見綠蘋齊

贈趙侍御

祿放跡異端偏荒事同蹇苟忘風波累俱會雲壑踐  
險式墅西湖倚廬對南峴夜樓江月入朝幌山雲卷

山勢遠濤連江途斜漢轉坐嘯予多暇行吟子獨善  
並轡曬郊郭方舟玩遊演虛聲萬籟分水色千里辨  
不知岸陰謝再見春露泣綠壤發欣顏華年助蟲篆  
上世時難接古人情可選汨渚煩爲媒多才怨成編  
長沙鳩作賦任道知淺請從三已心榮辱兩都遣  
伯奴邊見歸田賦因投趙侍御  
爾家歎窮鳥吾族賦歸田莫道榮枯異同嗟世網牽  
黃陵浮汨渚青草會湘川去國逾三歲茲山老二年  
寒鴉鳴舍下昏虎卧籬前客淚堪班竹離憂欲贈荃  
放言久無次觸興感成篇

奉酬見歸田賦垂贈之作 趙冬曦

窮鳥嬰籠綴孤飛任播遷鷦鷯王佐用復此挫冲天  
楚雲何掩鬱湘水亦迴澶懷哉愧木鴈忽爾枉蘭荃  
愈疾同枚叔銷憂比仲宣歸途書可畏弱操石猶堅  
覆載雖云廣涔陽直塊然

翻著葛巾呈趙尹 岳州作

昔日接羅倒今我葛巾翻宿酒何時醒形骸不復存  
忽聞有嘉客躡步出閑門桃花春徑滿誤識武陵源

同前

趙冬曦

美酒值芳春醒餘氣益真降歡時倒屣乘興偶翻巾  
徐榻思方建莊車理自均傲然歌一曲一醉濯纓人  
偶遊龍門北溪忽懷驪山別業呈諸留守



幽谷杜陵邊風煙別幾年偶來伊水曲溪嶂覺依然  
傍浦憐芳樹尋崖愛淥泉嶺雲隨馬足山鳥向人前  
地合心俱靜言因理自玄短才叨重寄尸祿愧妨賢  
每揖挂冠侶思從初服旋稻梁仍欲報歲月坐空捐  
助岳無纖芥輸溟謝未消還晤北轅失方茲南澗田  
奉酬龍門北溪作

石澗泉虛落松崖路屈迴聞君北溪下想像南山隈  
近念鼎門別遙思雲嶂陪不同奇觀往空觀斯文來  
歲後寒初變春芳前未開黃蕤裊岸柳紫萼坼春梅  
盡室茲遊翫盈門幾樂哉嗟遊洛陽陌夢詣建章臺  
野失巢由性朝非元凱才布懷欽遠近幽意日塵埃

同前

崔泰之

聞塞臨伊水驪山枕灞川俱臨隱路側同在帝城邊  
謝公兼出處攜妓玩林泉鳴鶻噴梅雪飛莖曳松煙  
聞琴幽谷裏看傳古巖前落月低幃帳歸雲繞管絃  
叨榮慙北閩微尚愛東田寂寞灰心盡蕭條塵事捐  
朝思登絕暫夜夢弄潺湲宿懷南澗意况覩北巖嚴篇

同前

崔日之

夙齡秉微尚中年忽有隣以茲山水癖遂得狎通人  
迨我南京道聞君北業新巖前窺石鏡河畔踏芳茵  
既憐伊浦淥復憶灞池春連詞謝家子同歡莫野賓  
趣閑魚共樂情洽鳥來馴誰念昔遊者衽命獨留秦

蕭條穎陽戀冲漠漢陰真無由陪勝躡空此翫書筠

同前

魏奉古

有美朝為貴幽尋地自偏踐臨伊水洎想望灞池邊  
是遇皆新賞茲遊若舊年藤蘿隱路接楊柳御溝聯  
道愜神情王機忘俗理捐遂初誠已重兼濟實為賢  
跡是東山戀心唯北闕前顧暫經拾紫多謝賦思玄  
未躡中林步空乘藻傳陽春和已寡扣寂竟徒然

僕自湯還都經龍門北溪莊宿張左丞崔禮  
部崔光祿並枉垂光顧數公宿敦道義雅尚  
林壑謂急於幽尋故此命駕遂不知別有勝  
賞偶然相過寒暄未周神意已往雲霞之致

茂而不存逸轡放驅清塵徒企耿歎不已而  
贈是詩

韋嗣立

棲閑有愚谷好事枉前軒樹接前驅擁巖傳後騎喧  
褰簾出野院植杖候柴門既拂林下席仍攜池上樽  
深期契幽賞實謂展歡言未眷誠未易佳時遊更敦  
俄看嘯儔侶各已共飛騫迹睇盡朝日長懷通夜魂  
空聞岸竹動徒見浦花繁多愧春鶯曲相承意獨存

酬韋祭酒自湯還都經龍門北溪見贈

聞君湯井至蕭洒憇郊林拂曙攜清賞披雲觀綠岑  
歡言遊覽意款曲望歸心是日期嘉客同山忽異尋  
桃源花路轉楊柳間門深汎舟伊水漲繫馬香樹陰

繁絃弄水族嬌吹狎沙禽春滿汀色媚景斜嵐氣窳  
懷仁殊未遠重德匪轉臨來藻敷幽思連詞報所欽  
冬日述懷奉呈韋祭酒張左丞蘭臺名賢知  
弱齡好經籍披卷即怡然覃精四十載馳騁數千言  
孔壁採遺篆周章考絕編袁公論劔術孫子叙兵篇  
魯史君臣道姬書日月懸從師改炎燠負爰遍山川  
上異西河夏中非北海玄光榮拾青紫名價接通賢  
既重萬鍾樂寧思三頃田長戟同分虎高冠亞附蟬  
晚懷重虛曠養志息雕鐫登高慙思拙匠物謝情妍  
不慕張平子寧希王仲宣誰爲登龍日翻成刻鶴年  
循循勞善誘軋軋思微牽琢磨才既竭鑽仰德彌堅

朽木誠爲諭捫心徒自憐終期吞烏夢振翼上雲煙  
賦成先擲地詞高直挾天更執樞衣禮仍開函杖筵  
露披槐市藹水靜璧池圓願逐從風葉飛舞翰林前

酬崔光祿冬日述懷贈答并序

太極殿衆君子分司洛城自春涉秋日有遊討旣而  
韋公中守茲樂便廢頃因公醺方接詠言崔光祿述  
忘論文首貽雅唱諸公嘉德敘事咸有報章若夫盛  
時榮位華景勝會此四者古難一遇而我輩比實兼  
之至於精言探道妙識發義戲謔而逢規誡指諷而  
見師表益過三友豈易得乎謂膏澤傍潤芝蘭久襲  
韋公近之矣以文會友以友輔仁崔弘近之矣其餘

尋聲響答望形影赴故亦峻碧池之漣漪增瑤林之  
浚若是用綴集勒成一卷永存几閣之翫無忘歡好  
之時焉

徐陳嘗並作枚馬亦同時各負當朝譽俱承明主私  
夫君邁前侶觀國騁竒姿山似鳴威鳳泉如出寶龜  
才雄子雲筆學廣仲舒帷紫緩拂三寺朱門臨九達  
昔我含香日連爾縉雲司朝攜蘭省步夕退竹林期  
中路一分手數載來何遲求友還相德群英復在茲  
留臺少人務方駕遽尋追涉翫懷同賞需芳憶共持  
迎賓南澗飲載妓東郊嬉春郊綠畝秀秋澗白雲滋  
名畫披人物良書討滯疑興來光不惜歡往迹如遺

歲晏罷行樂層城閒所思夜魂燈處耿朝髮鏡前衰  
忽在崔駟什兼流韋孟詞曲高弥寡和三善代爲師  
齊戒觀華玉留連難色絲終慙起余者何足與言詩

醜崔光祿冬日述懷并序

韋嗣立

光祿崔卿公曠懷通識濟時良具負材器晚圖籍愛  
林泉不遺琴詠門多長者善與人交僕忝臺閣早經  
聯事雖幸揖風彩而不接殷勤崔公以雅道自居未  
嘗至偃之室及僕積抱羸疾屢祈收退朝庭恩假職  
以優閑多取急歸林服餌爲事門堪羅雀庭見狎鷗  
崔公則多存訪不避風雨方知向時跡也今晨情也  
蘭菊春秋自芳竹柏歲寒無變僕敬之重之故不能

忘也嘗談及詞翰頗申倚撫忽枉贈章因以投報云  
爾  
亭伯負高名羽儀稱上京魏珠能燭乘秦璧許連城  
六月飛將遠三冬學已精洛陽推賈誼江夏貴黃瓊  
推演申都術旋參河尹聲累遷登御府移拜踐名卿  
庭聚歌鍾麗門羅榮戟榮鸚盃飛廣席獸火列前楹  
散誕林園意殷勤敬愛情無容抱衰疾良宴每招迎  
契得心逾重言忘道益真相勗忠義節共談詞賦英  
雕蟲曾靡棄白鳳已先鳴光接神愈駭音來味不成  
短歌甘自惡鴻藻難弥清東里方希潤西河敢竊明  
厚誣空見迨喪德豈無誠端守宮闈地寒煙朝暮平

顧才無郊淺懷器識憂盈月下對雲闈風前聞夜更  
昌年雖共偶歡會此難并為憐漳浦曲沉痾有劉禎  
同光祿弟冬日述懷韋祭酒張左丞二公並  
廊廟偉才朝廷舊相咸光首和殊為佳作輒  
繼陽春深增媿悚  
崔泰之

吾族白眉良才華動洛陽觀光初入仕應宿始為郎  
飛螢詵書籍白鳳吐文章海卿逾往雅河尹冠前張  
擇才綏隱郢殊化被江湘高樓臨廣陌甲第敞通莊  
別館邛山下疏亭洛水旁昌年豐賞陌暇日悅林塘  
衣冠皆秀彥羅綺盡名倡隔岸聞歌度臨也見舞行  
門庭寒變色榮戟自生光窮陰方鑿鑿殺氣正蒼茫

感時興盛作晚歲共多傷積德韋丞相通神張子房  
草編簪紜逸韻合宮商功名守留省濫跡在文昌  
家園遙可見臺寺近相望無庸乘侍謁有暇共翱翔  
棣華依鴈序竹葉拂鸞觴水坐憐秋月山行弄晚芳  
恩榮慙服冕友愛勗垂堂無由報天德相顧詠時康  
相竹  
李伯魚

北竹青桐北南家綠竹南竹林君早愛桐樹我初貪  
鳳栖桐不媿鳳食竹何慙棲食更如此餘非鳳所堪

荅李伯魚桐竹

結廬桐竹下室邇人相深接垣分竹逕隔戶共桐陰  
落花朝滿岸明月夜披林竹有龍鳴管桐留鳳舞琴

奇聲與高節非君誰賞心

和魏僕射還鄉

富貴還鄉國光輝滿舊林秋風樹不靜君子歎何深  
故老空懸劍隣交日散金衆芳搖落盡獨有歲寒心

和張監觀赦

日御臨雙闥天街儼百神雷野作解氣歲復建寅春  
喜候開星驛歡聲發市人金鑲能作賦來入管絃新

和張監遊終南

宿懷終南意及此語雲峯夜聞竹澗靜曉望林嶺重  
春煙生古石時鳥戲幽松豈無山中賞但畏心莫從  
和朱使欣道峽似巫山之作

江如曉天靜石似暮雲張征帆一流覽宛若巫山陽  
楚客思歸路秦人謫異鄉猿鳴孤月夜再使淚沾裳  
和朱使二首

南土多爲寇西江盡畏途山行阻篁竹水宿礙荏蒲  
使越才應有征蠻力豈無空傳人贈劍不見虎銜珠  
江勢連山遠天涯此夜愁霜空極天靜寒月帶江流  
思起南征棹文高北望樓自憐如墜葉汎汎侶仙舟

同趙侍御巴陵早春作

江上春來早可觀巧將春物妬餘寒水苔共繞留鳥  
石花鳥爭開鬪鴨欄佩勝芳辰日漸暖然燈美夜月  
初圓意隨北鴈雲飛去直待南州蕙草殘

乾湖作并序

趙冬曦

巴丘南澨湖者蓋沅湘澧汨之餘波焉茲水也淪匯  
洞庭澹澹千里夏潦奔注則決爲此湖冬霜旣寒則  
涸平野按爾雅云水返入爲澨斯名之作有由焉爾  
而此鄉炎暑子月草生彌望青青相與遊籍豈盈虛  
之可歎亦風景之多傷感物增懷因書其事三湖返  
入兩山間畜作澨湖彎復彎暑雨奔流潭正滿微霜  
及潦水初還水還波卷溪潭涸綠草芊芊岸蘄崖適  
來揮棹共回旋已復揚鞭恣行樂道傍耆老步蹉蹉  
楚言茲事不知年試就湖邊披草徑莫疑東海變桑  
田君訝今時盡陵陸我看明歲更淪連來今自昔無

終始人事迴環恒若是應思闔下聲華日誰謂江潭  
旅遊子初真正喜固賞然往蹇來譽宜可俟盈虛用  
捨輪與旋勿學靈均遠問天

同趙侍御乾湖作

江南湖水燕山川春江溢入共湖連氣色紛淪橫罩  
海波濤鼓怒上漫天鱗宗設族嬉爲府戈叟眾師利  
焉聚歌帆側拖弄風 赴險凌深遠灣浦一灣一浦  
悵遭迴千曲千差恍迷哉乍見靈妃含笑往復開遊  
女怨歌來暑往寒來運洄洑渾生水落移陵谷雲間  
墜翻散泥沙波上浮查棲樹木昨是飛霜下北津今  
朝行鴈度南濱處處溝洫清源竭年年舊葦白頭新

天地盈虛尚難保人間倚伏何須道秋月晶晶汎澄  
瀾冬景青青步纖草念君宿昔觀物變安得踟躕不  
衰老

同趙侍御望歸舟

山亭迥迥面長川江樹重重極遠煙形影相隨高翥  
鳥心腸併斷北飛船

遙同蔡起居偃松篇

清都衆木揔榮紛傳道孤松最出群名接天庭長光  
景氣連宮闕借氛氲懸池的的停華露偃蓋重重拂  
瑞雲不惜流膏助仙鼎願將楨榦捧明君莫比冥靈  
楚南樹朽老江間代不聞



同劉給事城南宴集

水竹幽閑地簪纓近侍臣雍容乘暇日蕭洒出罍塵  
樹足思朋鳥池深入養鱗管絃高逐吹歌舞妙含春  
老子叨專席歡遊隔搢紳此中情不淺遙寄賞心人

出湖寄趙冬曦二首

西汎平湖盡叅差入斷山東瞻岳陽郡汗漫太虛間  
窟步同行樂道文互屢看山戍上雲桂江亭臨水間  
川途倏忽閒風景依如昨湘浦未賜環荆門猶主諾  
何時餘美人載酒遊宛洛

寄姚司馬

共君春種瓜本期清夏暑瓜成人已去失望將誰語

裛露摘香園感味懷心許偶逢西風便因之寄鄂渚

寄許八

萬類春皆樂徂顏獨不怡年來人更老花發意先衰  
乳雀穿壇畫巢蜂觸網絲平生美容色宿昔影中疑  
遠道何由夢同心在者誰西風欲寄語憫默遂無詞

代書荅姜七崔九

婀娜金閨樹離披野田草雖殊兩地策幸共三春好  
花殊鳥飛處菜鏤虫行道真心獨感人惆悵令人老

代書寄吉十一

一鴈雪上飛值我衝陽道口街離別字遠寄當歸草  
目想春來遲心驚寒去早憶鄉乘羽翮慕侶盈懷抱

零淚蒼故人將隨江樹老

代書寄薛四

孤鴈東飛來寄我紋與素紋足經三象素當綜群務  
遠見故人心一言重千金蒼之綵毛翰繼以瑤華音  
歲寒衆木改松柏心常在

寄天台司馬道士

世上求真客天台去不還傳聞有仙要夢寐在茲山  
朱闕青霞斷瑤堂紫月閑何時枉飛鶴笙吹接人間

寄劉道士鳥

真人紫絳氣邀我丹田宮遠寄雙飛鳥鳥飛不礙空  
書香能和尚塔

大師捐世去空餘法力在遠寄無礙香心隨到南海

張說之文集卷第七

張說之文集卷第八

律詩

被使在蜀

即今三伏盡尚自客臨邛歸途千里外秋月定相逢

正朝摘梅

蜀地寒猶暖正朝發早梅偏驚萬里客已復一年來

蜀道後期

客心爭日月來往預期程秋風不相待先至洛陽城

過蜀道山

我行春三月山中百花開披林入峭舊攀磴陟崔嵬  
白雲半峯起清江出峽來誰知高深意緬邈心悠哉

再使蜀道

眇眇葭萌道蒼蒼褒斜谷煙壑爭晦深雲山共重復  
古來風塵子同眩望鄉目芸閣有儒生軺車倦馳逐  
青春客岷嶺白露搖江服歲月鎮羈孤山川長返覆  
魚遊戀深水鳥遊戀喬木如何別親愛坐去文章國  
蟋蟀鳴戶庭蠨蛸網琴筑

深渡驛

旅宿青山夜荒庭白露秋洞房懸月影高枕聽江流  
猿響寒巖樹螢飛古驛樓他鄉對搖落併覺起離憂

古泉驛

於陵仲子宅也

昔聞陵仲子守義辭三公身賃妻織屨樂亦在其中

豈無窮賤苦羞與傾巧同長白臨河上於陵入濟東  
我今行至此感歎石泉空

下江南向蘆州

天明江霧歇洲浦棹歌來綠水逶迤去青山相向開  
城臨蜀帝祀雲接楚王臺舊知巫山上遊子共徘徊

江路憶郡

霧斂江早明星翻漢將沒卧聞峽猿響日起視榜人發  
倚棹攀岸條憑船弄波月水宿獸洲渚晨光屢揮忽  
林澤來不窮煙波去無歇結思笙竽里遙情遊俠窟  
年貞不暫留歡愉及玄髮雲消戀山海禽馬懷燕越  
目非行後人安知慕城闕

廣州江中作

去國歲方晏愁心轉不堪離人與江水終日向西南

江中誦經

實相歸懸解虛心暗在通澄江明月內應是色成空

江中遇黃領子劉隆

危石江中起孤雲嶺上還相逢皆得意何處是鄉關

却歸在道中作

陳焦心息盡死意不期生何幸光華旦流人歸上京  
愁將網共解眼與代俱明復是三階正還逢四海平  
誰能定禮樂爲國著功成

還至端州驛前與高六別處

舊館分江口悽然望落暉相逢傳旅舍臨別撥征衣  
昔寄山川是今傷人代非往來皆此路生死不同歸

喜渡嶺

東漢興唐曆南河復禹謨寧知瘴癘地生入帝皇州  
雷雨蘇蟲螫春陽放鳥鳩回公炎海畔登降閩山陬  
嶺路分中夏川源得上流見花便獨笑看草即忘憂  
自始居重譯天星已再周鄉關絕歸望親戚不相求  
棄杖枯還植窮鱗涸更浮道消黃鶴去運啓白駒留  
江妾晨炊黍津童夜濯舟盛明良可遇莫後洛城遊

過漢南城歎古墳

舊國多陵墓荒涼無歲年涵湧蔽平崗汨若波濤連

上世千金子潛卧九重泉松柏剪無餘碑記滅罔傳  
葬於不毛地咸謂楚先賢事盡情可識使人心悵然

至尉氏

夕次阮公臺嘯歌臨爽塏高名安足賴故物今皆改  
吾兄昔茲邑遺愛稱良宰桑中雉未飛屋上鳥猶在  
途逢舊甿吏城有同寮來遠見咸相迎拂館來頃待  
慈惠留千室友于存四海始知魯衛閒優劣相懸倍

襄州景空寺題融上人蘭若

高名出漢陰禪閣跨香岑衆山皆圍繞長川復迴臨  
雲峯曉空變風木夜虛吟碧甃龍池滿蒼松虎徑深  
舊知青巖憶偏入杳冥心何由侶飛錫從此脫朝簪

四月一日過江赴荊州

春色沅湘盡三年客始迴夏雲隨北帆同日過江來  
水漫荊門出山平郢路開比肩羊叔子千載豈多才

襄陽路逢寒食

去年寒食洞庭波今年寒食襄陽路不辭着處尋山  
水祇畏還家落春暮

巡邊在河北作二首

去年六月西河西今年六月北河北沙場磧路何爲  
爾重氣輕生知許國人生在世能幾時壯年征戰髮  
如絲會待安邊報明主作頌封山也未遲  
撫劒空餘勇彎弧遂無力老去事如何據鞍長歎息

故交索將盡後進稀相識獨伶半死心尚有寒松直  
入海二首

乘桴入南海海曠不可臨茫茫失方面混沌如凝陰  
雲山相去沒天地互浮沉萬里無涯際云何其廣深  
潮波自盈縮安得會虛心

海上三神山逍遙集衆仙靈心豈不同變化無常全  
龍伯殊人類一釣兩鰲懸金臺此淪沒玉真時播遷  
問子勞何事江上泣經年隰中生紅草所美非美然  
清遠江峽山寺

流落經荒外逍遙此梵宮雲峯吐月白石壁淡烟紅  
寶塔靈仙湧懸龕造化功天香涵竹氣虛唄引松風

簷牖飛花入房廊激水通猿鳴知山靜魚戲辨江空  
靜默將何貴所貴心鏡同

相州冬日早衙

城外霄鍾斂閨中曙火殘朝光曜庭雪宿凍聚池寒  
正色臨廳事疑詞定筆端除苛囹息伐枳吏人寬  
河內功猶淺淮陽疾未安鏡中星髮變頓使世情闌

相州北亭

人務南亭少風煙北院多山花迷徑路池水拂藤蘿  
萍散魚時舞林幽鳥乍歌悠然白雲意乘興抱琴過

相州山池作

嘗懷謝公詠山水陶嘉月及此年事衰徒看衆花發

觀魚樂何在聽鳥情都歇星漢流不停蓬萊去難越  
鄴中秋麥秀淇上春雲沒日見塵物空如何靜心闕

岳州作二首

水國生秋草離居再及瓜山川臨洞穴風日望長沙  
物土南州異關河北信賒日昏聞鷓鴣地熱見脩蛇  
遠人夢歸路瘦馬嘶去家正有江潭月徘徊戀九華  
夜夢雲闕間從容簪屨列朝遊洞庭上緬望京華絕  
潦收江未清火退山更熱重欵視欲醉惜滿氣如噎  
器留魚鱉腥衣點蚊蚋血髮白思益壯心玄用弥拙  
冠劍日苔蘚琴書坐廢撤難有報恩字刻意長不滅

岳州行郡竹籬

山郡不溝郭荒居無翳壅愛人忠主利善守閉爲勇  
苟非小勤幸安得其逸寵板築恐土踈蕘城嫌役重  
藩柵聊可固筠篔近易奉差池截浦沙繚繞綠隈隴  
轟似長雲亘森如高戟聳預絕豺狼憂知免牛羊恐  
閭里寬矯步捧藁咨踏踵始果遊處心終日成閑拱

陪燕公行郡竹籬

趙冬曦

良臣乃國禎麾守去承明外戶人無閉浮江獸已行  
隨來晉盜逸民化蜀風清郭郭從彝典州閭荷德聲  
小人被天渥流宅巴丘城所賴中和正優遊鑿與耕

荊州亭入朝

巫山雲雨峽湘水洞庭波九辯人猶擯三秋鴈始過



旃裘吳地盡髭薦楚言多不果朝宗願其如江漢何

岳州西城

水國何遼曠風波遂極天西江三汜合南浦二湖連  
危堞臨清境煩憂斲豁然九圍觀掌內萬象閱眸前  
日去長沙渚山橫雲夢田汀葭變秋色津樹入寒煙  
潛穴探靈詭浮生揖聖仙至人今不見迹滅事空傳

岳州山城

山城豐日暇閉戶見天心東曠迎朝色西樓引夕陰  
書觀千載近學靜二毛深忽有南風至吹君堂上琴

奉和山城

郡館臨清掌閑局坐白雲訟虛棠戶曙觀靜竹簷曠

懸榻迎賓下趣庭學禮聞風傳琴上意遙向日華紛

岳州晚景

晚景寒鴉集秋聲海鴈歸水光浮日去霞彩映江飛  
洲白蘆花吐園红柿菜稀長沙卑暑地九月未成衣

遊洞庭湖湘二首

平湖曉望分仙矯氣氛氲鼓枻乘清渚尋峯弄白雲  
江寒天一色日靜水重文樹坐叅猿嘯沙行入鷺羣  
緣源班篠密胃徑綠蘿紛洞穴傳虛應楓林覺自薰  
雙童有靈藥願取獻明君

緬邈洞庭岫葱蒙水霧色宛在大湖中可望不可即  
剖竹守窮渚開門對奇域城池自縶籠纓綬爲徽纒

靡日不思往經時始願克飛棹越溟波維舟恣攀陟  
窳篠入雲步崎嶇倚松息巖壇有鶴過壁字無人識  
滴石香乳溜垂崖靈草植玩幽輕霧阻討異忘曛逼  
寒沙際水平霜樹籠煙直空宮聞莫覩地道窺難測  
此處學金丹何人生羽翼誰傳九光要幾拜三仙職  
紫氣徒想像清潭長眇默寬裳若有來覲我雲峯側

秋夜遊滄湖二首 并序

尹忭

燕公以蓋司馬初到趙侍御客焉聿理方舟嬉遊滄  
壑覽山川之異探泉石之奇騁望崇朝留躡待月一  
時之樂豈不盛歟賦詩者列之如左河閒尹忭詞也  
熊軾巴陵地鷁舟湘水潯江山與勢遠泉石自幽深

杳藹入天壑冥茫見道心超然無俗事情宴有空林  
江上饒奇山嶺羅雲水閒風秋樹色雜苔古色文班  
巴俗將千淺滄湖凡幾灣嬉遊竟不盡乘月汎舟還

同前二首

滄湖佳可遊旣近復能幽林裏棲精舍山閒轉去舟  
鴈飛江月冷猿嘯野風秋不是迷鄉路尋奇處處留  
坐嘯人事閑佳遊野情發山門送落照湖口望昇月  
林尋猿狖居水戲龜鼉穴朔風吹飛鴈芳草亦云歇

同前二首

政理常多暇方舟此沂洄吹笙虛洞苔舉幟便風催  
山暗雲猶辨潭幽月稍來清溪無數曲未盡莫先迴

煙靄夕微蒙幽灣賞未窮  
艤舟待初月褰幌招遠風  
鶴聲聒幽浦人火明暗叢  
東山雲壑意不謂爾來同

同前二首

遠水沉西日寒沙聚夜鷗  
平湖乘月滿飛棹接星流  
黃菜鳴棲吹蒼葭掃暗洲  
願移滄浦賞歸待潁川遊  
灣潭幽意深杳靄湧泉岑  
石痕秋水落嵐聚夕陽沉  
澄澈天爲底淵玄月作心  
青溪非大隱歸弃白雲尋

遊澨湖上寺

湖上奇峯積山中芳樹春  
何知絕世境來遇賞心人  
清舊巖泉樂吻嚶鳥獸馴  
靜言觀聽裏萬法自成輪

同前

王琚

春山臨遠壑水木自幽清  
夙志懷微上茲焉一放情  
雲間聽弄鳥煙上摘初英  
地側方無悶逾知道思精

同前

趙冬曦

江外多山水招要步馬來  
琴將天籟合酒共鳥歌催  
巖坐攀紅藥溪行愛綠苔  
所懷非此地遊望亦徘徊

汎洞庭

尹恁

風光浙瀝草中飄日采熒熒  
水上搖幸奉瀟湘雲壑  
意山傍容與動仙燒

同前

平湖一望上連天秋景千尋  
下洞泉忽驚水上光華  
滿疑是乘舟到日邊

滄湖山寺二首

空山寂歷道心生，虛谷超遙野鳥聲。  
禪室從來塵外賞，香臺豈是世中情。  
雲間東嶺千重出，樹裏南湖一片明。  
若使巢由同此意，不將蘿薜易簪纓。

楚老遊山寺，提携觀畫壁。  
揚袂指辟支，睦眄相闢閱。  
險哉透撞兒，百金賭一擲。  
成敗身自受，傍人那歎惜。

早霽南樓

山水佳新霽，南樓翫初旭。  
夜來枝半紅，雨後洲全綠。  
四運相終始，萬形紛代續。  
適臨青草湖，再變黃鸝曲。  
地穴穿東武，江流下西蜀。  
歌聞枉渚，澶舞見長沙。  
促心陋神和，生自足白髮。  
悲上春知當謝，先欲

奉和早霽南樓

趙冬曦

開曙躋南樓，凭軒四遐矚。  
物華蕩暄氣，春景媚晴旭。  
川霽湘山孤，林芳楚郊縟。  
列巖重壘，翠遠岸逶迤。  
綠風帆摩天，垠艇人散灣。  
曲鴻冥鶴舞，迭猿叫鶯聲。  
續羣動皆熙熙，噫予獨羈束。  
常欽才子義，問鴈傷蹉跎。  
雅向騷人文，懷沙何迫促。  
未知二賢意，去矣從前欲。

奉陪登南樓

君子每垂眷，江山共流眄。  
遠水林外明，近巖霧中見。  
終日西北望，何處是京縣。  
屢登高春臺，徒使淚如霰。

同前

危樓寫洞湖，積水照城隅。  
命駕邀漁父，通家引鳳雛。

山晴紅蕖匝洲曉綠苗鋪舉目思鄉縣春光定不殊

同前

趙冬曦

寬慰何以歡陰氣亦登望孤島輕霧裏行舟白波上  
目熒西北雲心醉東南陰昔日青溪子胡然此無狀

同前

客來已兩春更瞻韶光早花鳥翫環合江山復駢抱  
樓形寫北潭堞勢凌青島白雲謝歸鴈馳懷洛陽道

別滬湖

念別滬湖去浮舟更一臨千峯出浪險萬木抱煙深  
南郡延恩渥東山戀宿心露花香欲醉時鳥轉餘音  
涉趣皆留賞無奇不遍尋莫言山水間幽意在鳴琴

奉和別滬湖

趙冬曦

南湖美泉石君子翫幽奇灣澳陪臨泛巖岵共踐窺  
秋風頽桂竦春景綠楊垂郢路委分竹湘賓擁去麾  
枉帆懷勝賞留景惜差池水木且不棄情遊良可知

巴丘春作

日出洞庭水春山挂斷霞江岑相挾發卉木共紛華  
相戍南浮閣荆關北望賒湖陰窺魍魎丘勢辨巴蛇  
島戶巢為館漁人艇作家自憐心問景三歲客長沙

石門墨山二山相連有禪堂觀天下絕境

茵輪江上山近在華容縣常陟巴丘首天晴遙可見  
佳遊屢前諾芳月愆幽眷及此符守移歡言臨道便

既攜賞心客復有迭行掾竹徑入陰窅松崖上空藉  
草共林一色雲與峯萬變探窺石門斷緣越沙澗轉  
兩山勢爭雄峯巘相顧眄藥妙靈仙寶境華嚴壑選  
清都西淵絕金地東敞宴池果接園畦風烟迥臺殿  
高尋去石頂曠覽天宇遍千山紛滿目百川壑對面  
騎來雲氣迎人去鳥聲戀長揖桃源士舉世同企羨

遊龍山靜勝寺

每上襄陽樓遙望龍山樹鬱芾吐崗嶺微蒙在煙霧  
下車歲已成飾馬問餘步霜苦衰野草愛日陽江煦  
雲對石上塔風入松下路禪室宴三空人祠同六趣  
兒童共嬉謔猿鳥相驚顧南識桓公臺北亂先賢墓

世上人何在時聞心不住唯傳無盡燈可使有情悟

一柱觀

舊說江陵觀初疑神化來空中結雲閣綺靡隨風迴  
奈何任一柱斯焉容衆材奇功非長世今餘草露臺

登九里臺 是楚樊姬墓

楚國所以霸樊姬有力焉不懷沈尹祿誰諳叔敖賢  
萬化茫無在孤墳獨巋然北分陽臺陌南識郢城阡  
漠漠者宮樹蒼蒼雲夢田登高形勝出訪古今名傳  
自我來符守因君樹蕙荃詩書將變俗絺繡忽彌天  
志闡三折後愁值二毛前佇立帝京路搖心寄此篇

懷王墓

張說文集卷第八  
十一  
尹憂不可信似此敗懷王客死嶢關路返葬岐江陽  
啼狖抱山月飢狐獵野霜一聞懷沙事千載盡悲涼  
庾信宅作

蘭成追宋玉舊宅偶詞人筆湧江山氣文驕雲雨神  
包胥非救楚隨會返留秦獨有東陽守來嗟古樹春

張說之文集卷第八

張說之文集卷第九  
雜詩

欽州守歲

故歲今宵盡新年明旦來愁心隨斗柄東北望春迴  
岳州守歲三首後二首絕句

除夜清罇滿寒庭燎火多舞衣連臂拂醉坐合聲歌  
至樂都忘我冥心自委和今年即如此來歲知如何  
夜風吹醉舞庭戶對酣歌愁逐前年少歡迎今歲多  
桃枝堪辟惡竹爆好驚眠歌舞留今夜猶言惜舊年  
幽州新歲作

去歲荆南梅似雪今春薊北雪如梅共知人事何常

定且喜年華往復來邊鎮戍歌連夜動京城燎火徹  
明開遙遙西迥長安日願上南山壽一盃

元朝

元日今歲樂不謝往年春智向來心道誰為昨夜人  
耗磨傳茲日縱橫道未宜但令不忌醉翻是樂無為

耗磨日飲

同前

上月今朝減流傳耗磨辰還將不事事同醉俗中人  
春來半月度俗忌一朝閑不酌他鄉酒無堪對楚山

同前

趙冬曦

晦日

晦日嫌春殘江浦看湔衣道傍花欲合枝上鳥猶稀  
共憶浮槁晚無人不醉歸寄書題此日鴈過洛陽飛

湘州九日城北亭子

西楚茱萸節南淮戲馬臺寧知洹水上復有菊花杯  
亭帳憑高出親遊自遠來短歌將急景同使興情催

九日陪登高

陰行先

重陽初啓節無射正飛灰寂寞風蟬至連翩雙鴈來  
山棠紅葉下岸菊紫花開今日桓公坐多愧孟嘉才

岳州九日宴道觀西閣

搖落長年歎蹉跎遠宦心北風嘶代馬南浦宿陽禽  
佳此黃花酌酣餘白首吟涼雲霾楚望濛雨蔽荆岑



登眺思清景誰將卷濁陰釣詞出江霧樵唱入山林  
魚爲嘉名採木爲美材侵留爲洞庭觀望古意何深  
大道申中悟逍遙匪外尋叅佐多君子詞華妙賞音

九日進茱萸山詩五首

家居洛陽下舉目見嵩山刻作茱萸節情生造化間  
黃花宜泛酒青岳好登高稽首明庭內心爲天下勞  
菊酒攜山客茱萸繫牧童路疑隨大塊心似問鴻蒙  
九日重陽數三秋萬寶成時來謁軒后罷去坐蓬瀛  
晚節歡重九高山上五千醉中知偶聖夢裏見尋仙

春雨早雷

東北春風至飄飄帶雨來拂黃先變柳點素早驚梅

樹藹懸書閣煙含作賦臺河魚未上凍江蟄已聞雷  
美人霄夢著金屏曙不開無緣一啓齒空酌萬年杯

聞雨二首

窮冬萬化匝永夜百憂攢危戍臨江大空齋入雨寒  
斷猿知屢別嘶鴈覺虛彈心對爐灰死顏隨庭樹殘  
舊恩懷未報傾瞻鏡中看

多雨絕塵事寥寥入太玄城陰踈復合簷滴斷還連  
念我勞造化從來五十年悟將心徇物近得還自然  
閑居草木侍虛室鬼神憐有時進美酒有時泛清絃  
聲真不世識心醉豈言詮

夜坐

懷哉四壁時未有五都價百金誰見許斗酒難為買  
落花坐芳春孤月皎清夜復逢利交客題戶遙相謝

岳州夜坐

炎洲苦三伏永日卧孤城賴此閑庭夜蕭條夜月明  
獨歌還太息幽感見餘聲江近鶴時叫山深猿屢鳴  
息心觀有欲棄知返無名五十知天命吾其達此生

山夜聽鍾

夜卧聞夜鍾夜靜山更響霜風吹寒月竄篠虛中上  
前聲既春容後聲復晃盪聽之如可見尋之定無像  
信知本際空徒掛生滅想

冬日見牧牛人擔青草歸

東山盤石閣

塞上綿應折江南草可結欲持梅嶺花遠競榆關雪  
日月無他照山川何須別苟齊兩地心天問將何設

岳州觀競渡

畫作飛鳧艇雙雙競拂流枉衰山色變急棹水華浮  
土尚三閭俗江傳二女遊齊歌迎孟姥獨舞送陽侯  
鼓發南湖漾標爭西驛樓並駢恒詫速非畏日光道

看茱萸

白首看黃葉徂顏後幾何空慙棠樹下未有政成歌

戲草樹

忽驚石榴樹遠出渡江來戲問巴蕉菜何愁心不開  
微霜拂宮桂淒吹掃庭槐榮盛更如此慙君獨見哀

詠瓢

美酒酌懸瓢真淳好相映蝸房卷隋首鶴頸袖長柄  
雅色素而黃虚心輕且勁豈無雕刻者貴此成天性

詠鏡

寶鏡如明月出自秦宮樣隱起雙盤龍銜珠儼相向  
常恐君不察匣中委清量積翳掩菱花虚心蔽塵狀  
儻蒙羅袖拂光生玉臺上

詠塵

仙浦生羅襪神京染素衣禩山期益峻照日幸增輝  
夕畔龍媒合朝隨鳳輦歸獨怜范甑下恩遠畫梁飛

道家四首奉

勅撰

金壇啓曙闡真氣肅微微落月銜仙竇初霞拂羽衣  
香隨龍節下雲逐鳳蕭飛暫往蓬萊戲千年始一歸  
窈窕流精觀深沉紫翠庭金奩調上藥寶案讀仙經  
作賦看神雨乘查辨客星祇應謝人俗輕舉託雲輶  
金爐承道訣玉謀啓玄機雲逐笙歌度星隨宮殿飛  
乘風嬉浩蕩窺月弄光輝唯有三山鶴應同千載歸  
道記開中籙真官表上清焚香三鳥至鍊藥九仙成  
天上靈書下空中妙妓迎迎來出烟霧渺渺戲蓬瀛

雜詩四首

抱薰心恒焦舉旆心恒搖天長地自久歡樂能幾朝  
君看西陵樹歌舞爲誰嬌

山開苦積雨木落悲時遽賞心凡幾人良辰在何處  
觸石蒲堂侈洒我終夕慮客鳥懷主情銜花未能去  
剖珠貴分明琢玉思堅貞要君意如此終始莫相輕  
問子青霞意何事留朱軒自言心遠俗未始迹辭暄  
過蒙良時幸側息吏途煩簪纓非宿好文史弃前言  
夕卧北窓下夢歸南山園白雲慙幽谷清風媿泉源  
十年茲賞廢佳期今復存掛冠謝朝侶星駕別君門  
默念羣疑起玄通百慮清初心滅陽艷復見湛虛明  
悟滅心非盡求虛見後生應將無住法修到不成名

蜀路二首

雲埃夜澄郭山日曉晴鮮菜落蒼江岸鴻飛白鷺天

磷磷含水石翬翬覆林煙客心久無緒秩風殊未然  
徯蜀時物改別家鄉念盈憶昨出門日春風發鮮榮  
及滋旋轅地秋風滿路生昏曉思魏闕夢寐還秦京  
秦京開朱第魏闕垂紫纓幽獨玄虛閣不聞人馬聲  
藝業爲君重名位爲君輕玉琴知調苦寶鏡照膽清  
鷹飢常啄腥鳳飢亦待瓊於君自有屬物外豈能傾  
如無刺惠文太子挽歌詞二首

碣館英靈在瑤山美謚尊剪珪悲曩戲攻玉愴新恩  
宮仗專馳道朝儀送國門千秋穀門外明月照西園  
梁國深文雅淮王愛道仙帝歡同宴日神奪上賓年  
旒旒飛行樹帷宮宿野壘指言君愛弟揮淚滿山川

韋譙公挽歌二首

五瑞分王國雙珠映后家文飛書上鳳武結笥中蛇  
出預榮前馬迴鑾喪後車衮衣將錫命泉路有光華  
國騁雙騏驎庭儀兩鳳凰將星連相位玉樹伴金鄉  
歌舞侯家豔軒表戚里光安知杜陵下碑聲已相望

右丞相挽歌詞二首

王宰丹青化春卿禮樂才緇衣傳舊職華衮贈新哀  
路泣羣官送山嘶駟馬迴佳辰無白日賓閣有青苔  
闕歌出野田冠帶寢窮泉萬事皆身外平生尚目前  
西垣紫泥縛東岳白雲篇目惜同聲處從今遂絕絃

崔尚書挽詞

相宅龍坤寶承家占海封庭中男執鴈門外女乘龍  
鳴玉遊三省擬金侍九重一朝賓客散留劍在青松

右常侍集賢院學士徐公挽歌二首

才美臨淄北名高淮海東羽儀二省遍漁獵五車通  
玉殿孤新榜珠英落舊叢徒懸一寶劍何處訪徐公  
歎息書林友才華天下選並賦三陽宮連詩集賢殿  
具物衣如在咄嗟長不見既哀薤露詞豈忘平生眷

崔司業挽歌二首

海岱英靈氣膠庠禮樂資風流滿天下人物擅京師  
疾起揚雄賦魂遊謝客詩從今好文主遺恨不同時  
象設存華館威儀下墓田鳳池傷舊草麟史泣遺編

惟蓋墟烟没干旌隴日懸古木埋玉樹流恨滿山川

李工部挽歌三首

錦帳爲郎日金門待詔時楊宮先上賦柏殿幾連詩  
暖息琴歌斷淒涼蕭挽悲那堪灞陵岸迴首望京師  
宅地西陵上平生雅志從城臨丹闕近山望白雲重  
會葬知元伯看碑識蔡邕無由接神理揮涕問青松  
常時好賓客永日對絃歌是夕歸泉下傷心無奈何  
墓庭人已散祭處鳥來過碑石生苔蘚榮名豈復多

贈工部尚書馮公挽歌三首

忠鯁難爲事平生盡畏途如絃心自直秀木勢恒孤  
詔葬南陵道神遷北斗樞貴門傳萬石餘慶在雙珠

爵位題龍旒威儀出鳳城路傍人泣送門外馬嘶迎  
萬事非吾有千悲世是情昔日稱夏日今也謚冬卿  
窅然長夜臺舉世可哀哉泉戶一朝閉松風四面來  
石碑填駁蘇珠服聚塵埃誰言遼東鶴千年往復迴

徐高卸挽歌

蒲密遙千載鳴琴始一追公卿傳世範仁義續靈基  
不待南遊祿何先北帝期玉棺從此閉金鼎代相欺

節繁太子楊妃挽歌二首

西華三公族東闈五可才玉環初受慶金釵反逢災  
桂殿花空落桐園月自開朝堂將暮雨長繞望思臺  
昔日三朝路透迤四望車綉腰長命綺隱髮連支花

今春戾園樹索然無歲華共傷千載後唯號一王家

河上公

尊師馱塵去精魄知何 形氣不復生弟子空傷情  
濟北神如在淮南藥未成共期終莫遂寥落兩無名

傷妓人董氏四首

董氏嬌饒性多為窈窕名人隨秋月落韻入擣衣聲  
粉藥粘粧簾金花喝翠條夜臺無戲伴魂影向誰嬌  
舊亭紅粉閣宿處白雲關春日雙飛去秋風獨不還  
舞席沾殘粉歌梁委舊塵獨傷窓裏月不見帳中人

張說之文集卷第九

張說之文集卷第十

詩

鄴都引一首

君不見魏武草創爭天祿群雄睚眦相馳逐書攜壯  
士破堅陣夜接詞人賦華屋都邑繚繞西山陽桑榆  
漫漫漳河曲城郭為墟人改代但見西園明月在鄴  
傍高塚多貴臣蛾眉漫睪共灰塵試上銅臺歌舞處  
唯有秋風愁殺人

五君詠五首

達志美類刺異感義哀  
事顏氏之心也擬焉

齊公生人表向天開鶴唳清論早揣摩玄心晚超詣  
入相廊廟靜出軍沙漠霽見深呂祿憂舉後陳平計

甘心除君惡足以報先帝  
許公信國禎堯美具瞻情  
百事資朝問三章廣世程  
處高心不有臨節自爲名  
朱戶傳新戟青松拱舊塋  
淒涼丞相府餘塵在玄成

李公實神敏才華乃天授  
睦親何用心處貴不忘舊  
故事尊臺閣新詩冠宇宙  
在人忠所奉惡我誠將宥  
南浦去莫歸嗟嗟茂孫秀

代公舉鵬翼懸飛磨海霧  
志康天地屯適與雲雷遇  
興喪一言决安危萬心注  
大勲書王府窄命淪江路  
勢傾北夏門哀靡東平樹

耿公山岳靈才傑心亦妙  
鷲鳥峻標立辰玉扣清調

協贊休明啓思華日月照  
何意搖臺雲風吹落江徼  
湘流下潯陽洒淚一投弔

離會曲

何處送客洛橋頭洛水汎汎中  
行舟可憐河樹葉菱菱  
麩關關河鳥聲相思街鼓喧  
喧日云夕去掉歸軒兩  
相迫何人送客故人情故人  
今夜何處客

安樂郡主花燭行

青宮朱邸翊皇闈玉葉瓊麩  
榮紫微姬姜本來舅甥  
國卜筮俱道鳳凰飛星昂殷  
冬獻吉日天桃穠李遙  
相正鸞輓風傳王子來龍樓  
月伴天孫出平臺火樹  
連上陽紫炬紅輪十二行  
丹鑪飛鐵馳焱焰炎霞爍



電吐明光綠鞞紺幘紛如霧節鼓清笳前啓路城隅  
靡靡稍東還橋上鱗鱗轉南度五方觀者聚中京四  
合塵烟漲洛城商女香草珠結網天人寶馬玉繫纓  
百壺淥酒千斤肉大道連延障錦軸先祝聖年壽萬  
年復禱宜家承百祿珊瑚刻盤青玉罇因之假道入  
梁園梁園山竹凝雲漢仰望樓臺在天半翠幕蘭堂  
蘇合薰珠簾掛戶水波文別起芙蓉織成帳金縷鴛  
鴦兩相向劉茵飾地承瑀履花燭分階移錦帳織女  
西垂隱燭臺雙童連縷合歡盃藹藹綺庭嬪從列  
峩峩紅粉扇中開黃金兩印雙花綬富貴婚姻古無有  
清歌棠棣美王姬流化邦人正夫婦

時樂鳥篇并序

伏見天恩以靈異鸞鷟及能延京所述篇出示朝列  
臣按南海異物志有時樂鳥鳴云太平天下有道則  
見驗其圖丹首紅臆朱冠綠翼鶯領丈背糝以五色  
今此鳥本南海貢來與鸞鷟狀同而毛尾全異其心  
聰性辨護主報恩固非凡禽實瑞經所謂時樂鳥延  
京雖敘其事未正其名望編國史以彰聖瑞臣竊同  
延京獻詩一首

舊傳南海出靈禽時樂名聞不可尋形兒乍同鸞鷟  
類精神別稟鳳凰心千年待聖方輕舉萬里呈才無  
伴侶紅茸糝綉好毛衣清冷謳鷟好言語內人試取

御衣牽啄手瞋聲不許前心願陽鳥恒保日志嫌陰  
鶴欲凌天天情玩訝良無已察圖果見祥經裏本持  
符瑞感明王還用文章比君子自憐弱羽詎堪珎喜  
共華篇來示人一見嚶嚶報恩鳥多慙碌碌具官臣

開元樂章十九首奉 勅撰  
迎神永和之樂三章

肅九室 諧八音 歌皇慕 動神心 禮宿設  
樂妙尋 聲明格 裸奠臨 律迓氣 音入玄  
依玉几 御黼筵 聆愾息 優周旋 九韶編  
百福傳 信工祝 永頌聲 來祖考 聽和平  
相百辟 貢九瀛 神休安 帝孝成

皇帝行太和之樂一章

時文聖后 清廟肅雍 致誠勤孝 在貌思恭  
玉節四夏 金鏘五鍾 繩繩雲步 穆穆天容

酌瓚登歌肅和之章

天子孝享 工歌溥將 躬裸鬱鬯 乃熱膾薌  
臭以達陰 聲以求陽 奉時蒸嘗 永代不忘

迎俎雍和之樂二章 每章八句

在滌嘉豢 麗碑敬牲 角握之壯 色純之駢  
火傳陽燧 水漑陰精 太公胖俎 傳說和羹  
齋戒豐潔 俎豆有馨 亦有和羹 既戒既平  
鼓鍾管磬 肅唱和鳴 皇皇后祖 來我思成

酌獻用文舞一章

聖謨九德 眞言五千 慶集昌胄 符開帝先

高文仗鉞 克配彼天 三宗握鏡 六合煥然

帝其承祀 率禮罔愆 圖書霧出 日月清懸

舞形德類 詠諡功傳 黃龍蜿蜒 綵雲踰躔

五行氣順 八佾風宣 介此百福 於皇萬年

宣皇帝室光大之舞一章

肅肅藝祖 滔滔濬源 有雄玉劔 作鎮金門

玄王餘緒 後稷謀孫 肇禋九廟 四海來尊

光皇帝室長發之舞一章

具禮崇德 備樂承風 魏推幢主 周贈司空

不行而至 無成有終 神興王業 天歸帝功

景皇帝室大政之舞一章

於赫元命 權輿帝天 天齊八柱 地半三分

宗廟觀德 笙鏞樂勳 封唐之兆 成天下君

元皇帝室大成之舞一章

帝舞季歷 龍襲聖生昌 后歌有媯 貽炎孕皇

天地合德 日月齊光 肅雍孝享 祚我萬方

高祖神堯皇帝室大明之舞一章

赤精亂德 四海困窮 黃旗舉義 三靈會同

早望春雨 雲披大風 溥天來際 高祖之功

太宗文武聖皇帝室崇德之舞一章

皇合一德 廟宗百神 削平天下 大拯生民  
上帝配食 單于入臣 戎歌陣舞 曄曄震震


高皇邁道 端拱無為 化懷獯鬻 兵戢句驪  
高宗天皇大帝室 鈞天之舞一章

禮尊封禪 樂盛來儀 合位嬌后 同稱伏羲  
中宗孝和皇帝室 大和之舞一章


退居江水 鬱起丹陵 禮物還舊 朝章中興  
龍圖友及 駿命恭膺 鳴球香瓊 大禧是承

睿宗大聖真皇帝室 景雲之舞一章  
景雲霏爛 告我帝符 噫帝冲德 與天為徒

笙鏞遙遠 俎豆虛無 春秋孝獻 因復此都







淡江大學圖書館  
藏書

獸行歲歲相傳指樹日翩翩來伴慶雲翔  
聖皇至德與天齊天馬來儀自海西踠足徐行拜兩  
膝繁驕不進踏千蹄毳毼奮鬣時蹲踏鼓怒驤身忽  
上躋更有銜盃終宴曲垂頭驛尾醉如泥  
遠聽明君愛逸才玉鞭金翅引龍媒不應茲白人間  
有定是飛黃天上來影弄日華相照耀噴含雲色且  
徘徊莫言闕下桃花舞別有河中蘭茝開

張說之文集卷第十







~~~~~

